

**ROSA ANA PRADA QUEIPO, SECRETARIA DO CONCELLO DE AMES NA PROVINCIA DA CORUÑA**

**CERTIFICO:** QUE O PLENO DESTE CONCELLO LEVOU A CABO SESIÓN ORDINARIA O 27 DE MARZO DE 2014, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE.

**ACTA DA SESIÓN ORDINARIA LEVADA A CABO POLO PLENO DO CONCELLO O DÍA 27 DE MARZO DE 2014.**

No Salón de Sesiões da Casa do Concello de Ames, ás vinte horas (20:00) do día 27 de marzo de 2014, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde **Santiago V. Amor Barreiro** e coa asistencia das/os señoras/os concelleiras/os seguintes:

Grupo municipal Popular	Grupo municipal Socialista	Concelleiras/os non adscritas/os
M <sup>a</sup> Eugenia Martín Vicente Bernardo Moar Míguez Alfredo Taboada Alvelo M <sup>a</sup> Carmen Verde Leboráns	José M. Miñones Conde José Francisco Doval Galán Isabel González Cancela Carmen Fraga Crespo José Pazos Balsa Francisco Villaverde Marcos	María Pilar Candocia Pita Olalla Alvite del Río Susana Mayo Redondo Xosé Anxo Doval Rey Ramón García Argibay María Dolores Fernández Álvarez Manuel J. Ferreiro Santiago María González Gómez Emilio Martínez Carballeira

Non asiste pero xustifica a súa ausencia o concelleiro non adscrito, Alfonso Rey López.

Asiste o **interventor**, José Antonio Rueda de Valenzuela.

Actúa como **secretaria** a titular da Corporación, Rosa Ana Prada Queipo.

**ORDE DO DÍA****A) PARA DAR CONTA****Punto primeiro.- Dación de conta ao Pleno da Corporación dos decretos ditados pola Alcaldía dende a última sesión plenaria ordinaria.-**

O señor alcalde, **Santiago V. Amor Barreiro**, informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

**B) PARA DELIBERACIÓN E ACORDO****Punto segundo.- Aprobación, se procede, de actas anteriores.**

O señor alcalde, **Santiago V. Amor Barreiro**, somete a aprobación as actas correspondentes ás sesións ordinarias de 30 de xaneiro e 27 de febreiro de 2014.

No que respecta á acta de 30 de xaneiro de 2014 non se producen intervencións e a dita acta resulta aprobada por unanimidade dos membros presentes da corporación municipal.

No que respecta á acta de 27 de febreiro de 2014, a concelleira **M<sup>a</sup> Dolores Fernández Álvarez** sinala que na súa intervención no punto décimo onde pon "para la formación de la autonomía personal" debería poñer "para la promoción de la autonomía personal" e solicita tamén que se retire a repetición da expresión "de participación" e que se coloque algunha

coma máis.

Con respecto á mesma acta, o concelleiro **Bernardo Moar Míguez** sinala que no punto décimo primeiro, na moción de urxencia, a concelleira Susana Mallo se refería a el dicindo que o concelleiro vai como de compañía, despois como mascota e despois o cambiou por floreiro. Contéstalle **Susana Mallo Redondo** dicindo que iso non é exacto, que debería escoitar a gravación. Intervén a **secretaría** dicindo que as alusións da concelleira Susana Mallo a esa palabra as eliminou da acta porque a concelleira as retirou no propio pleno e así fíxose constar.

Sometida a votación, a acta do pleno de 27 de febreiro de 2014 resulta aprobada por maioría absoluta dos membros presentes, coa abstención de Xosé Anxo Doval Rey por non atoparse presente nesa sesión plenaria e o voto favorable coas correccións sinaladas dos restantes membros presentes da corporación municipal.

**Punto terceiro.- Adopción de acordo para que sexa o Tribunal Superior de Xustiza de Galicia o que nomee novo xuíz/a de paz substituto/a.-**

(.....)

Rematadas as intervencións o pleno da corporación por maioría absoluta dos seus membros presentes, coa abstención de María Pilar Candocia Pita, Susana Mallo Redondo, Olalla Alvite del Río e Xosé Anxo Doval Rey, e o voto favorable do resto dos membros presentes da corporación municipal, adopta os seguintes acordos:

**Primeiro.-** Non iniciar expediente para a elección de xuíz/a de paz substituto/a do Concello de Ames e que a designación sexa realizada polo Tribunal Superior de Xustiza de Galicia.

**Segundo.-** Facultar ao alcalde presidente do Concello de Ames, Santiago V. Amor Barreiro, para cantos trámites sexan necesarios para a mellor execución do acordado.

**Punto cuarto.- Revisión ordinaria do contrato de limpeza viaria e xestión do punto limpo, exercicio 2014.-**

(.....)

Rematadas as intervencións o pleno da corporación por maioría absoluta dos seus membros presentes, coa abstención de María Pilar Candocia Pita, Susana Mallo Redondo, Olalla Alvite del Río e Xosé Anxo Doval Rey, e o voto favorable do resto dos membros presentes da corporación municipal, adopta os seguintes acordos:

**Primeiro.-** Aprobar a revisión de prezos do contrato de concesión da limpeza viaria e xestión do punto limpo do Concello de Ames, adjudicado á empresa Urbaser S.A., pasando o novo prezo a ser de 682.560,59 € anuais, tendo estes efectos desde o 1 de xaneiro do 2014.

**Segundo.-** Facultar ao alcalde presidente do Concello de Ames, Santiago V. Amor Barreiro, para cantas actuacións de trámite sexan precisas para a mellor execución do acordado.

**Punto quinto.- Toma de coñecemento polo Pleno da renuncia do concelleiro José Francisco Doval Galán e da renuncia anticipada de Úrsula Seijas Seoane.**

(.....)

Rematadas as intervencións, o Pleno da Corporación toma coñecemento da renuncia ao cargo de concelleiro de **José Francisco Doval Galán**, pertencente ao grupo municipal do partido socialista, renuncia presentada por escrito mediante rexistro de entrada 3509, de 21 de marzo de 2014, e que non ofrece dúbidas da súa autenticidade.

Así mesmo, tamén se toma coñecemento da renuncia anticipada a cubrir a vacante da seguinte candidata á lista, **Úrsula Seijas Seoane** (registro de entrada 3510), que foi presentada por escrito con data 21 de marzo de 2014 e que non ofrece dúbidas da súa autenticidade.

Dado que a lista dos candidatos ou suplentes a nomear do PSdeG-PSOE resulta esgotada coa re-

nuncia da última candidata, Úrsula Seijas Seoane, seguindo o procedemento establecido no artigo 182.2 da LOREG, o representante do PSdeG-PSOE na Xunta Electoral de Zona de Santiago de Compostela nas eleccións municipais de maio de 2011, Antonio Leira Piñeiro, presenta escrito con data 21 de marzo de 2014 (R.E. 3511), polo que solicita que se designe como suplente na candidatura correspondente a José Blas García Piñeiro, con DNI 52.454.964-Z, acompañando escrito de aceptación de José Blas García Piñeiro nos termos previstos no punto segundo da Instrución de 10 de xullo de 2003 da Xunta Electoral Central.

Tomado coñecemento das renuncias, o Pleno declara a vacante producida e acorda remitir copia do expediente á Xunta Electoral Central solicitando a expedición de credencial a favor do designado polo PSdeG-PSOE, **José Blas García Piñeiro**, con DNI 52.454.964-Z, o cal terá dereito a tomar posesión no primeiro pleno que se celebre unha vez recibida a credencial e previo cumprimento dos requisitos legalmente establecidos.

Neste momento da orde do día, abandona o seu asento **José Francisco Doval Galán**.

### C) PARA CONTROL DO GOBERNO:

A concelleira **Pilar Candocia Pita** anuncia que quere presentar unha moción de urxencia e o señor alcalde informa que primeiro será tratada a moción incluída na orde do día.

**Punto sexto.- Moción dos concelleiros M<sup>a</sup> Dolores Fernández Álvarez, Alfonso Rey López, María González Gómez, Manuel José Ferreiro Santiago, Emilio Martínez Carballeira e Ramón García Argibay sobre escola de educación infantil no Rego dos Pasos Sur.**

O alcalde concede a palabra a un dos concelleiros propoñentes da moción, **Ramón García Argibay**, que comeza a súa intervención dando lectura á moción. Continúa dicindo: Esta é a moción que presentamos e que sometemos a consideración do Pleno porque consideramos que unha escola, neste caso para Bertamiráns, require duns orzamentos segundo estaba no convenio e figura reflectido na acta. Consideramos que non se pode poñer en risco, que os prazos son os que son, que estamos xa no mes de abril e que entre unha cousa e outra os tempos corren e andamos un pouco escasos de tempo.

Intervén, co permiso da presidencia, **Pilar Candocia Pita**, que di: Co texto da moción, con requirir que se constrúa canto antes a escola, como non pode ser doutro xeito estamos absolutamente de acordo. De todos modos, a nós parécenos rocambolesco, aínda que xa sabemos porqué se fai, que haxa que instar á Xunta para que a Xunta inste ao Concello, é unha cousa increíble. Xa sei que non para aquí, será para outra administración, pero haberá que revisar que facer para que os concelleiros da oposición podamos facer o noso traballo de verdade e teña sentido que instemos nós directamente e non que teñamos que "instar a través de" porque son unhas reviravoltas impresionantes, é rocambolesco. Non dubidamos que haxa que facelo así e sen poñer en cuestión o traballo dos técnicos, por suposto, simplemente nos parece que a normativa é absurda, como moitas outras.

Se estivésemos nunha situación de normalidade política non teríamos que chegar a este punto, porque o razoable despois de ter asinado un convenio que paralizou o pleno durante mais de media hora ás tantas da noite, sería que o goberno nos dese conta de como quedou asinado ese convenio e que nos dese conta tamén de que xestións fixo coa Xerencia do Consorcio e coa Xerencia de Escolas Infantís ao respecto da construción da escola. Eles fan unha planificación anual e dirían se ía ou non ía, cando pensan que vai e normalmente traen varios proxectos para que o Concello vexa. Eu na comisión informativa xa pedín que cando veñan a mostrar os proxectos tipo que teñen, que se faga unha comisión coas directoras das escolas infantís existentes no Concello, coas dúas municipais e coa Galiña Azul, porque son os profesionais os que saben o que falla e que cousas son necesarias. A nós parécenos importante que estean presentes na elección do modelo da escola. Hai traballos moi interesantes de pedagogos europeos, sobre todo italianos, que reivindicán a necesidade da presenza dos profesionais á hora de planificar as

infraestructuras. O Consorcio cónstame que o fai, está sempre na planificación da construción das escolas o equipo pedagóxico, pero tamén é necesario que haxa a “visión local” das necesidades , e iso é o que da o persoal de aquí, que sabe cales son as necesidades, como funciona o centro, moi especialmente a directora da escola infantil de Bertamiráns, que coñece moi ben a realidade, as necesidades horarias e tamén o que ten que ver coas infraestructuras. Na comisión o alcalde dixo que quedaran en que ían a traer as propostas pero que de momento non viñeran, a min me gustaría saber se xa viñeron. Tamén me gustaría saber unha cousa na que eu xa insistín cando o señor Argibay era concelleiro do goberno e foi a pleno a cesión da parcela, que era saber cantos metros van a utilizar para a escola e que se vai facer co terreo restante, porque agora xa se sabe de cantas unidades é. Insistíramos nisto, de feito nos íamos abster e votamos a favor porque nos dera o compromiso o señor Argibay de que o terreo restante ía a reverter de novo para o Concello, ben porque a institución que leve isto neste momento, ademais da escola infantil faga outra infraestructura como un centro de día ou outra cousa, ou ben que ese terreo reverta no Concello para que se poida dispoñer del para outra necesidade. Non estamos sobrados de terreo, por iso quería saber en que situación está ese tema. E para esta primeira intervención mais nada.

Intervén, co permiso da presidencia, **Ramón García Argibay**, que di: Unha vez que está exposta a moción, hai dúas cuestións moi importantes. A primeira é o tema dos orzamentos, porque é un compromiso explícito que figura no convenio, polo tanto esa partida ten que estar explicitada nos orzamentos; non hai orzamentos e polo tanto me gustaría saber cal é o problema, se é que o hai, para que non se traian os orzamentos a pleno. Estamos acabando o mes de marzo e non hai visos de orzamentos. A segunda cuestión é que despois de tanto tempo, estamos falando xa de mais de un ano, nos gustaría que esta cuestión non quedara sen resolver; por iso instamos á Xunta de Galicia a que tome a decisión, nos consta que a Consellería ten o orzamento para facelo e tamén ten a intención de facelo e polo tanto agora mesmo o inconveniente mais grande que vemos é que o Concello non ten esa achega disposta. Polo tanto, consideramos que isto hai que tomalo en serio; consideramos que esta escola é imprescindible para Bertamiráns e para Ames. Nos custou poñer a parcela axeitada, porque hai que recordar que a parcela que nun primeiro momento se tiña definida polo anterior goberno socialista era unha parcela que estaba ao lado da Casa da Cultura de Bertamiráns en forma de cuña, que non era a parcela mais axeitada e despois se fixo este cambio, se obtivo esta parcela no Rego dos Pasos Sur, unha parcela grande, que como dicía antes dona Pilar se intentou que se acomodara para esta escola e co compromiso totalmente certo de que o terreo sobranterá poderán reverter no Concello. Polo tanto, creo que o traballo se fixo no seu momento e está aí, a parcela é a mais axeitada que se podía encontrar en Bertamiráns, se puxo a disposición, se fixeron todos os trámites e agora simplemente nos queda ese trámite importante tamén, pero que non deixa de ser un trámite, que é o tema dos orzamentos. Polo tanto consideramos que hai que poñerse a traballar dunha vez por todas e traelos canto antes. De momento nada mais.

Intervén, co permiso da presidencia, **José Miñones Conde**, que di: Principalmente a nós hai unha cousa que nos está preocupando cando se está a falar do tema da escola infantil, é o tema do orzamento. Xa na Comisión o alcalde dixo que existía un orzamento por parte do goberno, entendo que do goberno da Xunta, e agora acaba de afirmar tamén o señor Argibay que existe un orzamento por parte da Xunta. Ao grupo socialista nos gustaría preguntarlle ao alcalde se realmente existe ese orzamento e onde está, xa que nos orzamentos da Xunta non aparecía orzamento para esa escola infantil, por iso nos chaman poderosamente a atención esas afirmacións que se fan. Esa sería a primeira dúbida. A segunda gran preocupación é a situación na que estamos no Concello de Ames, con este goberno en minoría e tal e como dicía anteriormente Pilar, é unha mágoa que se traia este asunto sen tan sequera ter esa información previa ou se dera conta sobre ese convenio que no seu día tivo que saír da forma que saíu, incluíndo dous puntos que para nós eran importantísimos, como eran o tema da xestión pública e que contemplara o número de unidades. O preocupante é iso, que é unha obriga ter orzamentado por parte do Concello, do goberno, ese 40%, preto de 330.000 euros, e estamos sen orzamentos. Como dicía o señor Argibay, estamos xa entrando en abril e non sabemos nada e por moito que

preguntemos unha e outra vez seguimos sen saber nada e se nos seguirá dicindo que virán proximamente os orzamentos ou ese borrador. Pregunto que previsión ten este goberno de cara a eses orzamentos para contemplar esta partida, porque todo o que sexa retrasar esa contemplación nos orzamentos será retrasar o inicio das obras e polo tanto poñer en risco, como se di na exposición da moción, a subvención europea, que tal e como estamos non é para andar perdendo eses cartos. Polo tanto, de primeiras estas preguntas: para cando ten previstos os orzamentos este Goberno, con data concreta, e que non sexa como o ano pasado que falaba en febreiro e estamos esperando ao día de hoxe. En aquela entrevista que fixo vostede en Correo TV, dixo que sería en febreiro ou en marzo e estamos en marzo, faltoulle a vostede dicir o ano. Tamén queremos saber onde están contemplados eses orzamentos da Xunta, é dicir, se existe un interese real da Xunta, porque estamos falando de que a Xunta ten interese pero que nós saibamos non existe un documento oficial no que así se contemple, mais alá de conversas que vostede di que tivo coa Xunta. Nós entendemos que esa información é básica para poder argumentar o noso voto.

Intervén o **alcalde** para dicir: En primeiro lugar a min gustaría dicir que a construción da escola infantil de Bertamiráns por parte do Consorcio non está en risco. Hoxe se celebrou a Asemblea anual do Consorcio e nesa asemblea se deu lectura ao informe orzamentario, é dicir, aprobouse o orzamento do Consorcio. Tamén se deu conta da construción de diferentes escolas infantís en Galicia e unha delas, nese informe de xestión sometido a aprobación é a que se vai a construír en Bertamiráns. Polo que nos din, aínda hoxe mo volveron a dicir dende a Xerencia do Consorcio, o trámite que teñen pendente eles é que entre o proxecto no Concello. Me din que na primeira ou segunda semana do vindeiro mes debería entrar a solicitude de licenza, e agora mesmo o proxecto da construción xa está encomendado á empresa Tragsa, que será a que construír a escola infantil. No tocante ao orzamento municipal, segundo me di o señor interventor, na primeira quincena do vindeiro mes pode estar o borrador de orzamentos. No tocante á achega que ten que facer o Concello do 40%, de 320.000 euros, dende o Consorcio tamén nos din que non é un atranco que non teñamos o orzamento aprobado para que se comece coa construción da escola infantil.

O alcalde abre unha segunda quenda de intervencións, comezando **Pilar Candocia Pita**, que di: Entón intúo que eles xa decidiron cal é o proxecto. Se xa está a empresa é que xa teñen o proxecto e na Comisión vostede dixo que non consultaran co Concello. Sería o primeiro caso que eu coñezo dun Concello que non supervisa o modelo de escola. Intervén o **alcalde** dicindo: O proxecto mandarano no seu día para a obtención da licenza.

Continúa **Pilar Candocia** dicindo: Antes diso, a Comisión pedagóxica se reúne sempre cos técnicos que o Concello designe, o gabinete pedagóxico no caso de que o teñan, a directora dunha escola infantil, un concelleiro, un arquitecto, quen cada concello designe, e reúnen para ver as alternativas de escola que teñen porque sempre teñen mais dunha, para ver cal se adapta mellor á parcela e para ver tamén, tendo en conta as escolas xa coñecidas, como son as necesidades, que cousas teñen que ir e que non. E iso normalmente se fai previamente á contratación.

Intervén o **alcalde** dicindo: Me parece que é unha encomenda directa que se fai a esa empresa.

Continúa **Pilar Candocia**: ¿Dunha obra desa cantidade?. Contesta o **alcalde**: Si. Houbo outro caso aquí, o cuartel da Garda Civil foi unha encomenda directa tamén a esa mesma empresa, Tragsa.

Continúa **Pilar Candocia** dicindo: ¡Estamos ben! Tomamos nota. Pois nada, en todo caso eu lamento que non se teña traballado cos técnicos antes. En todo caso se pode traballar despois. Espero que xa que non se fixo previamente, como se tiña que ter feito, que se faga a posteriori, para que se podan seguir resolvendo cousas. Non é que sexa un antollo meu, é que hai moitísimos estudos que recomentan que iso se faga así, non só nas escolas infantís, en todo. ¿Cantas veces dicimos, incluso cando facemos nós unha casa, que había



que volver a facela porque sabemos que algo non funciona? Son os profesionais que traballan niso os que saben que cousas dan problemas e cales non, é de sentido común sacarlle o mellor partido posible ás cousas, sobre todo cando se vai a investir a cantidade que se vai a investir nisto, que non é menor, que son 820.000 euros. Ten sentido que se faga unha instalación, que ademais de ser unha boa instalación que o será sen dúbida, ademais sirva para o que ten que servir e que os profesionais que vaian a traballar nela podan facer o seu traballo da mellor maneira posible e os nenos e nenas estean tamén nas mellores condicións posibles. É algo que non costa nada, que é so cuestión de vontade política e como se ve parece que xa non a houbo de partida. Esperemos que non haxa ningún problema co orzamento; se ven a pleno ben e se non ven a ver que pasa, pero o certo é que pode haber algún problema, claro que o pode haber. Eu o que non entendo é que se o Consorcio aprobou hoxe os seus orzamentos, ¿como vostede non tiña esa documentación previa e non sabía o día da Comisión que iso xa ía e como non lle comunicou nada o Consorcio? É triste que un grupo teña que presentar unha moción para enterarse de algo despois de que foi a oposición quen lle sacou as castañas do lume para que se puidera aprobar aquel día, pero é o que hai. Non podemos esperar mais a estas alturas. Nada mais, grazas.

Intervén, co permiso da presidencia, **Ramón García Argibay**, que di: Eu creo que está todo xa mais que dito. É unha pena chegar a esta situación, sen orzamentos dende hai dous anos, sen interese ningún polo tema da construción da escola, polas unidades, polo sistema pedagóxico... A verdade é que é todo unha mágoa, pero xa case non nos sorprende nada ultimamente e polo tanto o que nos queda é esperar que a Consellería neste caso faga a escola e que se non hai orzamentos do Concello, dalgún xeito se solucione, pero a verdade é que é unha mágoa que un requirimento que está no convenio asinado polo alcalde e pola conselleira, unha vez mais tampouco se cumpira.

Intervén, co permiso da presidencia, **José Miñones Conde**, que di: A verdade é que como é isto das casualidades, xusto metedes unha moción sobre o tema da escola infantil e xusto hoxe, día do pleno se reúne o Consorcio, son casualidades que chaman a atención. A nós nos chama mais a atención incluso que, como dixo Pilar, que se diga na Comisión hai agora case unha semana que existía ese orzamento e se aprobe hoxe, é algo que tamén chama bastante a atención, e mais se cabe que non se dixera nesa Comisión que ía haber esa reunión da Asemblea anual do Consorcio e que se ía tratar este tema. Ou non o sabía vostede de aquela, imos a pensar ben, que vostede non o sabía, entón é algo que lle comunican hoxe a través dese informe da xestión do Consorcio. Sobre o tema do proxecto presentado, a verdade non sei se hai un erro ou vostede se columpia ou é así. É dicir: o proxecto está presentado, o vai a levar Tragsa, está xa contratado e a obra vaise a levar por encomenda directa.

Intervén o **alcalde** para dicir: Iso é o que se comunicou hoxe na Asemblea do Consorcio.

Continúa **José Miñones Conde**: Na Comisión o outro día, Pilar preguntaba polo tema de facer o proxecto, é lóxico que cando se vai a facer unha escola infantil nun Concello se fale alomenos co Concello, cos técnicos municipais ou cos responsables directos, para ver como se quere deseñar esa escola, iso é o mínimo que debería facerse. Pero se realmente ese proxecto xa está encomendado directamente a Tragsa para que se faga, veremos como ven e se ao final teremos que recordar este 27 de marzo con mágoa porque non se puido facer doutra forma con todos os inconvenientes que iso poida levar. No tema dos orzamentos temos a proposta dun técnico que di que se van traer na primeira quincena de abril, segundo traslada vostede; polo tanto esperamos ese borrador de orzamento para as seguintes semanas. Entendemos que ese orzamento, que é o que corresponde para este ano, será falado coa oposición, estando vostedes en minoría. Ten a nosa porta aberta para falar dese orzamento ou do que queira porque entendemos que é a prioridade neste momento do concello de Ames.

Intervén o **alcalde** dicindo: Moi ben, moitas grazas. Dicirlle que eu non teño o coñecemento de que cando se fixo a Escola de Educación Infantil do Milladoiro se facilitaran modelos de proxecto

ao Concello ou que se sometese ao resto da Corporación. Entendo que neste caso o Consorcio lle fai unha encomenda a Tragsa para construír en base a un proxecto, en base a esas 6 liñas que están comprometidas como mínimo, esas 82 prazas e agora mesmo, segundo me trasladan, nas vindeiras semanas unha vez que supervise Tragsa ese proxecto, solicitarán a correspondente licenza. Cando se solicite a licenza e fagan chegar ese proxecto, se lles dará traslado aos señores concelleiros para que poidan velo e revisalo.

Intervén **Pilar Candocia Pita** para dicir: Unha observación, por alusións. Si que houbo encontros para a Escola Infantil do Milladoiro, entre o Concello e o Consorcio. Foron encontros entre as persoas que o Concello nomeou para falar da escola, entre outras cousas porque a escola era de 7 unidades, foi a primeira de 7 unidades que fixo o Consorcio, e polo tanto serviu de modelo para as escolas de 7 unidades, que non había ningunha previa. Eu cando pedín unha comisión non pedín que estiveran os membros da oposición, pedín que estiveran os profesionais, que é o mesmo que houbo para a Escola Infantil do Milladoiro. E falo con coñecemento de causa porque eu tiña responsabilidades naquel momento nas escolas infantís. Nada máis, moitas grazas.

Rematadas as intervencións o pleno da corporación, por maioría absoluta dos seus membros presentes, cos votos a favor dos 6 membros do grupo municipal socialista, e dos concelleiros/as non adscritos M<sup>a</sup> Pilar Candocia Pita, Olalla Alvite del Rio, Susana Mayo Redondo, Xosé Anxo Doval Rey, Ramón García Argibay, M<sup>a</sup> Dolores Fernández Álvarez, Manuel José Ferreiro Santiago, María González Gómez e Emilio Martínez Carballeira, e a abstención dos 5 membros do grupo municipal popular, presta aprobación á moción do teor literal seguinte:

*“Fai máis de 2 anos, exactamente o 13 de decembro de 2011 o pleno da corporación aprobou por unanimidade a cesión de unha parcela para a construción da segunda escola Infantil de Bertamiráns. A parcela de 3.389 metros está situada ao carón do paseo fluvial no sector Rego dos Pasos Sur. En Xaneiro do 2012 aprobouse por unanimidade o último trámite de cesión desta parcela.*

*Despois de dous longos anos de espera, o 22 de xaneiro de este ano, por fin asinou se o convenio que pon as bases para a construción desta segunda escola de Bertamiráns que contará con 6 unidades e 82 prazas co compromiso engadido de que o terreo sobran te reverta para o concello a fin de buscarlle unha utilidade acorde co emprazamento.*

*O orzamento estimado para esta actuación e de 820.000 € dos cales, o concello terá que aportar o 40% e dicir, 328.000 €. De igual xeito, no convenio firmado queda claramente explicitado que o Concello “comprométese a incluír no orzamento municipal do exercicio 2014, a contía correspondente ao 40% do custe de construción da escola infantil.”*

*Tendo en conta que a escola tería que comezar antes de que remate o ano para non perder os fondos europeos que aporta unha parte importante do financiamento e que a día de hoxe os orzamentos municipais seguen prorrogados por segundo ano consecutivo. E tendo en cona que PxA leva máis de un ano reclamando estes orzamentos e ata ao de agora non se presentou nin sequera o borrador, os concelleiros de PxA presentamos á consideración deste pleno a seguinte Moción.*

- 1. Instar a Xunta de Galicia para que no prazo máis breve posible requira ao concello de Ames todas as cuestións técnicas e administrativas necesarias pendentes para poder comezar a construción da nova escola infantil de Ames en Bertamiráns.*
- 2. Instar a Xunta de Galicia coa máxima urxencia posible, a realizar todos os trámites necesarios para que a construción da nova escola infantil de Bertamiráns se faga de xeito inmediato.*
- 3. Facultar ao alcalde do concello de Ames para que realice todos os trámites necesarios nas xestións inherentes a este tema.*
- 4. Que a partir da aprobación de esta moción, se informe nos sucesivos plenos ordinarios do estado das xestións relacionadas con esta escola infantil.”*

## **Moción de urgencia, presentada polos concelleiros Pilar Candocia, Olalla Alvite, Susana Mayo e Anxo Doval, para a restitución simbólica nos seus cargos da Corporación democrática destituída en xullo de 1936.-**

O **alcalde** cede a palabra a un dos concelleiros asinantes da moción para a xustificación da urgencia. Toma a palabra **Xosé Anxo Doval Rey**, para dicir: A urgencia xustifícase brevemente dicindo que foi presentada unha moción en prazo, ao final chegou unha comunicación da Alcaldía de que non podía ser aceptada como moción; reformouse dando o visto bo por parte da Secretaría e preséntase agora por urgencia. Pretendemos que se aprobe hoxe, entre outras cousas porque o día da República se celebra o mes que ven, por iso nos gustaría que fora aprobada antes desa data esta moción.

Rematadas as intervencións e realizada a votación da urgencia da moción presentada, esta resulta rexeitada ao non obter maioría absoluta, cos votos favorables á urgencia de M<sup>a</sup> Pilar Candocia Pita, Olalla Alvite del Río, Susana Mayo Redondo, Xosé Anxo Doval Rey, José Miñones Conde, Isabel González Cancela, Carmen Fraga Crespo, José Pazos Balsa e Francisco Villaverde Marcos e a abstención dos cinco concelleiros do grupo municipal popular e dos concelleiros/as Ramón García Argibay, M<sup>a</sup> Dolores Fernández Álvarez, Manuel J. Ferreiro Santiago, María González Gómez, Emilio Martínez Carballeira.

## **Punto sétimo.- Rogos e Preguntas.**

### **Rogos.-**

Intervén a concelleira **Pilar Candocia Pita** para formular os seguintes rogos:

**Primeiro rogo.-** Despois do pleno mais rápido do ano, refírome á orde do día, que é a que indica a cantidade de xestión que fai o goberno, despois o control que fai a oposición é outra cousa. A orde do día vinte minutos, aínda é de mais para o que o goberno fai. Eu estaba ofrecida a facer un rogo, sempre o mesmo, e deixei de facelo porque, que se lle vai a facer, unha confía nos seres humanos, e como había un compromiso de que se ían a facer os regulamentos deixei de facer ese rogo. Pero hoxe vou a facelo, pero utilizando a psicoloxía inversa. Voulle rogar que xa non traia os regulamentos, porque despois de estar tres anos todos os santos plenos, eu creo que menos dous ou tres plenos e nalgúns porque xa non se chegou aos rogos, insistindo por favor que se fixeran, dende a toma de posesión deste mandato, onde xa anunciamos o do regulamento de participación cidadá, e o goberno e o alcalde miraron para outro lado. Pois sinceramente, despois de ter demostrado que os veciños non lle importan nada e a participación moito menos, canto menos os teña que ver moitísimo mellor, ao mellor utilizar a psicoloxía inversa ata fai que ao final o adiante. Pero desde logo, nós non vamos a participar a estas alturas da película, en que queda o que queda, un pouquiño mais dun ano, para lavarlle a vostede e ao seu goberno a cara, que como demostrou neste pleno é incapaz de xestionar nada. E porque ademais, como sempre, ten unha capacidade especial para coller propostas que fai a oposición e baleiralas de contido e polo tanto inutilizalas, porque cando unha cousa se fai e se fai mal, despois a xente pensa que xa non pode ser doutra maneira que como se fixo, polo tanto se cadra xa é mellor que non o traia. Pero se a psicoloxía inversa serve para que a sangue flúa un pouco polas súas venas e fagan algo, pois a ver se vai. Ese é o meu primeiro rogo.

**Segundo rogo.-** O segundo rogo é que estou absolutamente abraiada, desconcertada, decepcionada como ser humano, porque non se permitira que se falase aquí da moción que presentamos. Presentámola primeiro en prazo, tiña defectos de forma e foron subsanados e agora non queren falar. Do que non quere falar vostede é que polo medio das armas se botou abaixo un goberno que o pobo lexitimou, e o que nós queríamos hoxe é que ese goberno, o goberno de Oscar Lojo Batalla, fose posto no seu lugar, fose restituído, por xustiza. E unha vez mais



encontramos a desidia: xa non é que voten a favor ou en contra, que iso si que o entendo, pero aquí ten que poderse falar de todo, o dixeran noutras ocasións e o sigo dicindo, ter medo a falar é terlle medo á democracia e é desde logo non saber traballar moi ben os fundamentos que esta ten. Porque unha cousa é posicionarse en contra, que iso o entendo, pero outra cousa é non querer falar. Vostedes coma sempre dan a espalda a todo, pero non teñan medo, estamos nós para dar a cara, démola sempre e seguirémola dando. Xa que vostedes non foron quen de restituír ou de querer restituír a estas persoas, a súa honestidade, que foron representantes do pobo como é vostede hoxe e que quede constancia de que eran ben moderados, probablemente nada teñen que ver comigo e ao mellor as súas familias hoxe están mais cerca de vostede ou moito mais alá do que podo estar eu, pero me da exactamente igual do que fosen, porque eran os representantes lexitimamente elixidos polo pobo, e foron botados abaixo polas armas, polo fascismo, tal e como se lle chamou en toda Europa á destitución da democracia por medio das armas. É triste, moi triste. Rógolle que pense ben o que fixeron hoxe e rogo tamén que pensemos que non somos mais por non ser capaces de falar, ao contrario, demostramos que somos bastante menos.

**Terceiro rogo.-** Un terceiro rogo ten que ver cunha queixa que presentaron uns veciños, unha queixa de ruidos por un pub, foron ao Valedor do Pobo, presentaron escritos en varias ocasións. Eu teño toda a documentación. Gustaríame e rógolles que nos informen de que xestións fixo o Concello ao respecto a isto. É o pub Moma, cerca do centro de Saúde, na rúa Poeta da Maía. Os veciños presentaron varias queixas porque din que hai uns ruidos insoportables e gustaríanos saber que xestións fixo o Concello e se poden pasarnos a documentación no caso de que se fixera algunha medición ou no caso de que o pub xa fixera as obras para solucionar os problemas.

**Cuarto rogo.-** Rógolle tamén que nos contesten ás cuestións que pedimos e presentamos aquí en Pleno. No último Pleno eu pedín que se nos dera conta de porqué había unha indicación de que había amianto na caseta das hortas urbanas e a día de hoxe, que eu saiba, non se nos contestou nada, non chegou ningunha contestación ao respecto. A pegatina existía, eu teño a foto, non se nos dixo nin porqué existía nin porqué deixaba de existir. Facía referencia a que alí había amianto e a nós nos parecía que que haxa amianto nunha caseta onde se gardan os apeiros dunhas hortas urbanas nas que o concepto de horta urbana é un concepto de achegar aos veciños a ecoloxía e demais é un pouco contradictorio, pero nada se nos contestou. O alcalde díxome o outro día que porqué eu non lle recordara o da marquesiña de bus, hoxe non pasei por alí pero onde non estaba posta. Dígoos porque esta vez recordeillo. Tamén quería saber cando está previsto que se poña a funcionar a parada, porque non é tanto problema da marquesiña, senón que os buses paren alí. A xente se para o bus aínda que non haxa marquesiña lle da igual. Tamén pedín información sobre cantos veciños hai en situación de non poder pagar a escola infantil porque vostedes contestaron a iso nos medios de comunicación ao respecto da queixa que nós metemos de Aurora Boquete porque se lle mandou unha carta na que se lle requiría que pagase unha cantidade e que senón se lle botaba fora á súa filla e dixeran que non se podía condonar esa débeda porque había moitas familias nesa situación. No último Pleno pedimos que se nos dera conta de cantas familias había na situación que estaba ela, que era con dereito á exención e sen terlla aplicado despois de que ela tivera pedido de palabra, non por escrito, dende o mes de outubro e se lle aplica en maio. Entón, ¿cantas familias hai nesa situación? Porque dixo na prensa que había moitas e que para non facer diferencias entre as familias non se podía. Pedímolo no pleno pasado e non se nos deu tampouco conta diso.

Intervén o **alcalde** para dicir: O da marquesiña de bus se porá en breve. En relación á caseta, creo recordar que esa caseta tiña unha pegatina de amianto pero non ten amianto, tal e como nos din dende o departamento de Medio Ambiente.

Pregunta **Pilar Candocia**: ¿E logo por que tiña a pegatina esa?. Intervén **Eugenia Martín Vicente** para dicir: Ya se retiró la pegatina. Contesta o **alcalde**: Alguén lle puxo esa

pegatina, pero non ten amianto.

Intervén a concelleira **Susana Mallo Redondo** para formular os seguintes rogos:

**Quinto rogo.-** Teño un pequeno rogo para que se repinte o paso de peóns que hai diante do colexio de Ventín, está totalmente borrado e creo que xa o pediron eles en varias ocasións e reiteráronme que o fixera chegar.

**Sexto rogo.-** O segundo meu rogo ten que ver cunha campaña que se presentou aos medios de comunicación hai dous días que se chama “Como cho digo”, non sei se os concelleiros tiveron a oportunidade de coñecela. Esta campaña está encabezada por xuíces e xuízas, por adestradores como o do Obradoiro ou do Deportivo da Coruña, é dicir, personalidades do deporte, polos actores mais recoñecidos e tamén personalidades da administración. Consiste en que todas aquelas persoas no ámbito da cultura, do deporte, da xustiza, do que sexa, que teñen polo seu cargo unha capacidade representativa e utilízana en galego sexan respectados despois polos medios de comunicación escritos e as súas intervencións se transcriban en galego. Aquí os concelleiros, algúns teñen o galego como lingua propia, outros non, algúns teñen mais fluidez e outros non, pero creo que todos coincidimos en que falamos en galego neste Pleno porque é a lingua da Corporación e porque con iso fomentamos o seu uso e o seu prestixio. O que intenta facer esta campaña é que despois iso non se desvirtúe cando se reproducen as intervencións, porque perde parte do seu efecto. É unha campaña moi simple, que eu estou segura de que o Servizo de Normalización Lingüística poderá darlle os detalles técnicos e o meu rogo é, aparte de que o goberno municipal subscriba esa campaña como tal, que faga unha pequena campaña interna a nivel de Corporación, para que todos nós a asumamos, e por suposto para que lla fagamos chegar aos medios de comunicación, porque esa é a utilidade.

Intervén o **alcalde** para dicir: Tomamos nota.

Intervén a concelleira **Olalla Alvite del Río** para formular os seguintes rogos:

**Sétimo rogo.-** O meu rogo é para a concelleira de Medio Ambiente. En xaneiro do ano pasado tomouse un acordo neste Pleno por unanimidade para saír do Refuxio de Animais de Bando e outorgouse o servizo de lacería á empresa Servigal. Como vostedes saben, a nós isto non nos convenceu dende o primeiro momento. Levamos a cabo un proceso de negociación ou de acordo, sobre todo tendo en conta a opinión de asociacións protectoras de animais que traballan aquí en Ames. Chegamos a uns acordos que aquí foron apoiados por toda a Corporación e que ademais figuran expresamente na acta dese pleno porque nós así o solicitamos e polo tanto son de obrigado cumprimento. Estes acordos, durante este ano que durou o contrato con esta empresa, non se cumpriron, tales como a publicación actualizada e real na páxina web de toda a información dos animais que se recollen, que non se cumpriu; que a empresa elaborara unha ficha que entregaría ao Concello con cada animal que recollese, eu non sei se a empresa cumpriu esa obrigaón, pero nese acordo aparecía tamén que esas fichas tiñan que ser entregadas ou ensinadas ou facilitadas a esas asociacións de protección de animais que falan con nós e con vostede previamente para chegar a estes acordos, eu sei que iso non se cumpriu.

Intervén a concelleira de Medio Ambiente **Mª Eugenia Martín Vicente** dicindo: ¿Alguna vez vinieron a pediras y se les negaron?. Contesta **Olalla Alvite**: Si. Contesta **Eugenia Martín**: Pues no tengo conocimiento, hablaré con el técnico, porque hemos revisado ese acuerdo y se está cumpliendo. Pregunta **Olalla Alvite**: ¿Se está cumpliendo?. Contesta **Eugenia Martín Vicente**: Las asociaciones no se han puesto en contacto conmigo para decirme que se les haya negado información. Intervén **Olalla Alvite** para dicir: As asociacións viñeron en mais dunha vez, e de dúas e de tres e de catro ao departamento de Medio Ambiente que vostede dirixe, eu non sei se vostede estaba ou non. O acordo plenario dicía que “os servizos de Medio Ambiente darán toda a

información sobre os animais recollidos ás asociacións protectoras que o soliciten e xestionarán a posibilidade dos voluntarios para acceder ás instalacións". Isto vostede non o cumpriu. A publicación da información na páxina web non a cumpriu, porque mire, no mes de xaneiro deste ano nós facíamos un rogo neste mesmo sentido e poñíamos en evidencia que a información non podía estar actualizada porque eu non me podo crer que en tres meses tan só se recolleran dous cans. Se eu agora mesmo accedo á páxina web do Concello e doulle ao link desa información, só podo acceder á información de dous cans que foron recollidos neste mes de marzo. ¿E todo o anterior onde está?. Todo isto ven a conto porque aínda este mes na Xunta de Goberno que vostedes celebraron o 6 de marzo, acordaron iniciar un expediente de contratación, mediante procedemento aberto, oferta economicamente mais vantaxosa, co único criterio de adxudicación o factor prezo, para o servizo de lacería. Está faltando outra vez ao acordo plenario, porque nese acordo nós tamén falamos que isto era algo pasaxeiro durante un ano e que durante este tempo estudaríamos xunto coas asociacións a mellor maneira para tratar este asunto, que vostedes o único que ven é como un problema de sacar aos cans de adiante e punto, pero teñen que entender que haxa cidadáns aos que vostedes representan aos que os animais lles importen mais que iso, o cal é normal. Neste contrato que vostedes sacan, no que o único factor é o prezo, vostedes poñen un orzamento base de licitación de 36.000 euros polos catro anos de duración máxima do contrato mais IVE. Se divido iso, a min dáme como uns 9.000 e pico euros ao ano, non sei se me equivoco. E durante este ano o servizo custou 14.400 mais IVE. Intervén **Eugenia Martín**: 36.000 euros es un año. Continúa **Olalla Alvite**: Polos catro anos de duración máxima do contrato, incluídas as prórrogas, ¿isto canto ven sendo ao ano?. Contesta **Eugenia Martín**: 36.000 euros al año, prorrogable año a año. Pregunta **Olalla Alvite**: ¿Mais IVE? ¿36.000 euros ao ano, prorrogable ano a ano?.

Pregunta **Pilar Candocia**: ¿Se pode contratar directamente, 36.000 euros ao ano prorrogable ano a ano?.

Ante a pregunta contesta a **secretaria**: Mañá o miraremos, non me acordo das cifras neste momento.

Intervén o **alcalde** para dicir: Non temos aquí o expediente, mañá o miraremos e contestarémolles.

Intervén **Pilar Candocia** para dicir: Pero Intervención pode contestar se pode contratarse outra vez a empresa. Contesta o **interventor**: A contratación menor ten dous límites: o importe e o tempo. Mais alá dun ano non podes ir cunha contratación menor. Intervén **Pilar Candocia**: Pero xa pasou un ano, se pode seguir contratando así?. Contesta o **interventor**: A cobertura do contrato antigo mentres durou foi dun ano, e volverá a ter cobertura cando se contrate outra vez, no interin entre os dous contratos, non terá cobertura contractual.

Continúa co seu rogo **Olalla Alvite**: O único que digo é que se segue con isto adiante, tal e como está, Eugenia, faltas á túa palabra con nós e coas persoas que viñeron aquí a falar contigo antes de chegar a este acordo. Rogaría que recapacites con este asunto e que fales con esas asociacións, que a min me consta que viñeron aquí en repetidas ocasións interesándose por esa información e que non se lles facilitou e que se están preocupando polos cans que levan para Ribeira e que están facendo un traballo voluntario moi loable e están dispostas a traballalo aquí e buscar outras alternativas. Creo que cando as persoas, os cidadáns, están dispostos a todo isto, cando menos hai que escoitalos, iso cando menos.

Intervén o concelleiro **Ramón García Argibay** para formular os seguintes rogos:

**Oitavo rogo.-** Teño un rogo que a verdade é que o vou a enfocar a partir do que di o dicionario da Real Academia Española, en canto ao significado de "mezquindad", que cualifica como *"que escatima excesivamente el gasto, falta de nobleza, de espíritu, pequeño o diminuto, pobre, necesitado, falta de lo necesario, desdichado, desgraciado, infeliz"*. ¿E

por que falo de mezquindade? Porque a un veciño de Guimarás, á altura do número 5, na parroquia de Bugallido, en novembro se lle puxo unha farola. Puxéronlla vostedes, me gustaría saber quen lla puxo. E en marzo, concretamente onte pola noite, lle cortan a luz desa farola. Pero ademais antonte, o mércores, os empregados municipais cumprindo ordes do goberno, do alcalde, se personaron alí para quitar esa farola, e os veciños que estaban alí lle dixeron que onde estaba esa orde de Alcaldía, e ao final os empregados do Concello non quitaron esa farola, pero cortaron a luz ao día seguinte. Evidentemente os empregados fan o seu traballo, indicados por alguén do goberno, non sabemos quen, nos gustaría que nolo aclarara. Pero a realidade é que en novembro se lle pon unha farola e en marzo se lle corta a luz. Eu non entro en se está ben ou mal colocada, eu non vou a entrar niso porque no seu momento se se colocou sería por algo. Pero ¿por que fan iso? Seguindo coa Real Academia Española, buscando hai unha palabra que é “prevaricación”, que está moi de moda ultimamente, por desgraza. A definición que fai a RAE é: “delito consistente en dictar a sabiendas una resolución injusta una autoridad, un juez o un funcionario”. Esa é a definición, eu non sei se é prevaricación ou non, pero é unha resolución inxusta a todas luces. Non sei se é prevaricación ou non, porque non me corresponde a min dicilo, pero o que está claro é que o que se fixo con esa actuación dende logo deixa moito que desexar, non sei se vostedes son ou non conscientes disto. Polo tanto, lles rogo primeiro que me digan quen ordenou a instalación dese punto de luz. En segundo lugar tamén lle rogo que me diga quen ordenou o corte de luz. E tamén lle rogo que restableza o servizo, mentres polo menos non haxa unha aclaración aos veciños ou mentres non se dea unha explicación ao respecto. Lle rogo ademais que fale cos veciños, rógolles que non actúe como di o dicionario da RAE con mezquindade. Rógolles ademais que teña en conta que unha actuación dese tipo ou se xustifica ou non se fai, e non creo que custe tanto traballo falar coas persoas e darlles unha explicación. O que non é entendible dende logo é que en novembro se lle pon e en marzo se lle quita. Probablemente esa actuación provén das vísceras e non da cabeza e iso sería o triste, é unha cuestión que vostede ten que aclarar, vostede ou o seu goberno, o concelleiro de obras ou quen dera esa orde. Polo tanto rógolles, insisto, que me diga quen ordenou a instalación dese punto de luz e que me diga quen ordenou o corte de luz.

**Noveno rogo.-** Outro rogo é o que me fan uns veciños do Milladoiro. Consiste en que na zona onde está a expendedora de leite hai un paso de peóns que vai dende o Supercor a unha librería que hai enfronte. Alí houbo varios incidentes, incluso un par de atropelos, e o rogo que me fan é que se poña un paso de peóns elevado e no seu defecto un semáforo, ou incluso que se poñan as dúas cousas. A verdade é que é unha zona moi transitada, hai moito fluxo de persoas, e entón o rogo que me fan os veciños é que se poña o paso de peóns un pouco elevado e un semáforo para que poidan cruzar.

**Décimo rogo.-** Outro rogo, tamén encamiñado na mesma zona que falábamos antes da farola, que vostedes se preocupan de cortar a luz pero non se preocupan de arranxar a estrada no marxe dereito en dirección á rotonda que vai á estrada da Deputación con dirección á Ramallosa. Está bastante deteriorada, ten fochancas considerables. Ademais está o morrillo solto e cada vez que pasan os coches por alí e se coincide que hai algún peón pode provocar un accidente, algunha lesión ou algo ao desprender a pedra o vehículo. Polo tanto tamén lle rogo que teña en conta esa situación.

**Décimo primeiro rogo.-** Outro rogo é o arranxo e acondicionamento da zona de Buceleiras porque a maleza invade a calzada nun treito onde a pista é bastante estreita.

**Décimo segundo rogo.-** Outro rogo, que xa llo temos feito en innumerables ocasións. Nós non utilizamos a psicoloxía inversa porque a psicoloxía ou funciona ou non funciona, pero por intentalo que non quede. Rógolles que nos conteste aos innumerables escritos que temos presentado e ás preguntas e ás cuestións que plantexamos nos plenos. Rógolles tamén que en vez de tomar decisións arbitrarias, antes polo menos fale cos veciños e lle rogo que me responda aos rogos que lle fixen anteriormente. De momento nada mais, grazas.

Intervén a concelleira **María González Gómez** para formular os seguintes rogos:

**Décimo terceiro rogo.-** O primeiro rogo quero dirixirlllo ao concelleiro de Turismo e á concelleira de Medio Ambiente para ir planificando xa e que non nos pille o toro; rogo que soliciten os permisos pertinentes a Augas de Galicia e a Patrimonio para a limpeza e acondicionamento de Ponte Maceira, de cara ao bo tempo e á tempada de verán, así como a zona do camiño que transcorre de Santiago a Fisterra, que se prevé que esta tempada se van a incrementar moito o número de peregrinos que van a percorrelo, polo que sería interesante telo adecentado e planificado con tempo, non como o ano pasado que se foi a limpar en setembro.

**Décimo cuarto rogo.-** Tamén quero rogar unha vez mais que en canto se poida se repaña a marquesiña de Lens, que seguen esperando por ela.

**Décimo quinto rogo.-** Así mesmo, nesta tarefa que lles dicía de planificación, referente a Ponte Maceira e ao camiño llo fago ao concelleiro de obras, de cara á planificación da limpeza de cunetas, reparar os campos das festas cando chegue o momento porque sempre son temas nos que non sei porqué sempre vai o toro pillando, entón recordarllo por se acaso aínda non o teñen na axenda que vaian poñendo ao día esas tarefas.

Intervén a concelleira **Mª Dolores Fernández Álvarez** para formular os seguintes rogos:

**Décimo sexto rogo.-** Hablando tamén de limpeza, rogaría que se quitaran los pinos que están tirados en la acera que baja de Aldea Nova a Bertamiráns y que ya llevan allí algo así como dos o tres meses.

**Décimo sétimo rogo.-** También rogaría que se hiciera limpeza de las calles interiores de Aldea Nova.

Intervén o concelleiro **Emilio Martínez Carballeira** para formular os seguintes rogos:

**Décimo oitavo rogo.-** Boas noites. Teño cantidade de rogos. Vou empezar pola aldea de Carballo. Fará cousa de dous meses mais ou menos, de feito teño aquí fotos, a verdade é que me levei unha gran desilusión e a pregunta que eu me fago é a seguinte: ¿realmente vostedes saben onde está o campo de fútbol de Carballo? Unha cousa é dicir o que aquí vou a dicir e outra cousa é ir alí e ver como está aquilo, non é un campo de fútbol, aquilo é unha toxeira, está alí para ver. Non ten nin trinta metros cadrados, non dispón dun espazo de trinta metros cadrados limpos para poder xogar unha pachanga, supoño que saberá que é unha pachanga, considero que coñece un pouco ese deporte. A verdade é que é unha auténtica pena: o peche, as varandillas, a metade delas están no chan, as que non están no chan están completamente dobradas; hai algúns tramos do campo que faltan, debéronos de levar ou o que sexa; as porterías xa non digamos, están completamente oxidadas, ou sexa, un abandono total. Alcalde, quixera que o fora a ver, non me faga caso ao que lle digo, quixera que o fora a ver porque aquilo é unha auténtica vergonza. Eu non sei se fan uso del ou non, pero tal e como está dende logo, realmente aínda que queiran ir a xogar alí un partido, nas condicións en que está o campo desde logo non poden facer uso del para nada. Ao lado deste campo hai outro campo de tenis, cerrado cunha alambrada que está completamente rota, a maleza invade por completo a metade da pista, tanto por dentro como por fóra. Vaian a velo.

**Décimo noveno rogo.-** O lavadoiro de Salgueiros perde auga por todas partes. Os veciños xa non poden facer uso del, sobre todo neste tempo, porque xa digo, non hai forma posible de que poidan ir alí pola cantidade de auga que ten. Tampouco estaría de mais meterlle un pequeno tellado para que poidan facer uso del.

**Vixésimo rogo.-** A pista de Salgueiros está completamente inundada e completamente chea de fochas. Hai inundacións, corre a auga de tal forma por encima da estrada que iso require un entubamento da auga xa, e ao pasar tractores e vehículos pesados a pista está



completamente estragada.

**Vixésimo primeiro rogo.-** O muíño de Salgueiros, a verdade é que quixera que o foran a ver porque ademais está en moi bo estado. É un muíño que ten un entorno moi bonito, ten un lavadoiro precioso, pero iso so se vería se realmente se limpara e estivera noutras condicións. E é unha pena, porque é un muíño que eu creo que incluso foi reformado hai pouco e está en moi boas condicións, eu creo que habería que ter en conta este tipo de cousas das que dispón o Concello.

**Vixésimo segundo rogo.-** O camiño que vai dende o medio da aldea de Salgueiros e ese muíño está completamente inundado de maleza, iso está aí para velo. Carmen, ti que es de alí, supoño que non me deixarás mentir. Eu creo que non costa moito traballo, que pase por alí a patrulla do Concello ou quen sexa e que desbroce aquilo.

**Vixésimo terceiro rogo.-** Con respecto á fonte do campo da festa de Biduído, leva meses sen funcionar.

**Vixésimo cuarto rogo.-** Con respecto a Lapido, hai unha farola no medio da aldea que está colgando do poste e que é un perigo continuo, está totalmente colgando, ao lado da casa de Tembra.

**Vixésimo quinto rogo.-** Con respecto a Lapido, o día 25 de xaneiro houbo unha emerxencia e tivo que acceder alí unha ambulancia medicalizada para ir a buscar a un veciño que se puxo moi mal e a única forma de acceder á aldea era pola ponte de Lapido. Nesa ponte botaron os petriles, as pedras, entorpecendo o acceso á aldea polo menos dous meses. Non sei se é cousa do Concello, se é cousa de Augas de Galicia, ou de quen sexa, coa particularidade de que moitas pedras desas están tiradas no río, non sei se se arranxou.

Contesta o **alcalde** dicindo: Si, xa fai mes e medio ou dous meses polo menos.

Continúa **Emilio Martínez Carballeira** dicindo: Eu o que quero dicir é que botou polo menos mes e medio coas pedras entorpecendo o acceso. Eu creo que hai que axilizar un pouquiño mais a cousa. É mais, creo que os propios veciños se brindaron para facer limpeza na ponte, viñeron aquí, pero non se poden tocar esas Augas de Galicia, e un polo outro a casa sen varrer.

Intervén o **alcalde** dicindo: Está arranxada a ponte, dende hai mais de mes e medio e se aseguraron para que non se moveran.

Continúa **Emilio Martínez Carballeira** dicindo: Se se fixo así, me parece ben. Agora, eu creo que se é que a riada move esas pedras, unicamente que sexa unha cousa imposible de acceder aí, hai que arranxalo canto antes, sobre todo sendo o único acceso que ten esa aldea en caso dunha emerxencia, porque polo medio da aldea non pode pasar unha ambulancia.

**Vixésimo sexto rogo.-** Con respecto á área de recreo de Lapido, non hai unha farola que funcione. E a maiores ten árbores tirados e non sei se ao día de hoxe se limpiaron ou non se limparon, non o sei.

**Vixésimo sétimo rogo.-** O entorno do muíño que está na entrada da aldea de Lapido, non sei se o víchedes, é un muíño que data do ano 1846, que ten un entorno impresionante e está completamente esquecido. Eu creo que non costa tanto traballo facerlle unha limpeza cando chegue o tempo, pero facela cando chegue o tempo, non acordarse diso cando ven o inverno.

**Vixésimo oitavo rogo.-** A iluminación do camiño empedrado que vai da ponte de Lapido ao medio da aldea, ídem de ídem, non hai unha que funcione e coa particularidade de que hai algunha que ten os cables completamente á vista, sendo un perigo constante, sobre todo para os rapaces.

**Vixésimo noveno rogo.-** Con respecto a Loureiros, hai un camiño que vai polo medio da aldea e

é o único camiño do que dispón sobre todo un dos veciños para poder acceder á súa casa. Volvo a dicir: hai unha emerxencia, teñen que ir os bombeiros e non poden acceder a esa vivenda, o camiño está completamente estragado.

**Trixésimo rogo.-** Os colectores que hai ubicados na entrada mesmo desa urbanización que hai alí en Loureiros eu creo que están mal ubicados porque en vez de estar arriba de todo tiñan que estar abaixo da urbanización, para evitar que persoas maiores teñan que subir esa costa, sobre todo no inverno, onde o camiño pode dar a volta perfectamente ao fondo da aldea. Eu creo que non costa ningún traballo facer iso e creo que é de sentido común.

**Trixésimo primeiro rogo.-** Referíndome a Loureiros, alí existe unha fosa séptica que unha cousa é contalo aquí e outra cousa é velo; neste tempo aínda se vai aguantando, pero o que viva alí na aldea e teña que soportar esa fosa séptica cos olores que desprende en pleno verán, iso é para denunciálo. Fagan as xestións que teñan que facer e que se faga cargo quen teña que ser pero isto os veciños non o poden estar soportando.

**Trixésimo segundo rogo.-** Sígolle recordando que ten veciños que levan mais dun ano esperando que sexan recibidos por vostede, alcalde. Estoullo dicindo de boas maneiras, reciba á xente, gánese á xente, que non ten necesidade ningunha de andar na boca de ninguén.

Intervén o **alcalde** dicindo: Dígame quen son, porque é moi fácil dicir aquí que hai xente que está pendente de recibir, cando non é así.

Continúa **Emilio Martínez Carballeira** dicindo: Non me vale que me diga iso alcalde, vostede vaia ao rexistro. Unha das solicitudes é esta, eu creo que hai persoal no Concello ao que vostede lles pode dicir que lle dean as solicitudes de veciños que queren falar con vostede, xa verá como está todo rexistrado, pero o que pasa é que hai que ter vontade e díxenllo moitas veces que os veciños teñen que estar por enriba de todo. Esquézase dos políticos, dos conselleiros e de todo o demais e reciba aos veciños, que mellor lle irá. Vostede non faga caso, vostede compróbeo.

Intervén o **alcalde** dicindo: Despois me cerciuro.

**Trixésimo terceiro rogo.-** Subindo o monte de Lapido ou baixándoo, eu creo que todos os que estamos aquí, todos, vemos que hai dous pinos tirados enriba da beirarrúa e non hai un que dixera absolutamente nada de nada, pero levamos con iso aí tres meses, os de Aldea Nova debedes de saber moito diso. Que ten que sacalos?.

Intervén o concelleiro de vías, obras, parques, xardíns, patrimonio e urbanismo **Alfredo Taboada Alvelo**, que di: A Deputación, ou estradas, xa teñen alá a notificación. Continúa **Emilio Martínez Carballeira** dicindo: Alfredo, mira unha cousa, se non é cousa do Concello o que hai que facer é dirixirse a quen proceda e que saquen iso dunha vez. Intervén o **alcalde** para dicir: Xa se fixo. Continúa **Emilio Martínez Carballeira** dicindo: Xa se fixo pero eu non vexo que o sacaran.

**Trixésimo cuarto rogo.-** Con respecto á pista de tenis que está ao lado do pavillón de Bertamiráns, algunha xente que vai alí moi a miúdo a xogar ao tenis, a verdade é que se están queixando moito. Esa pista require un mantemento como Deus manda. Os postes de ferro, sobre todo un deles que aguanta a rede está totalmente dobrado. Eu creo que non costa moito facer iso.

**Trixésimo quinto rogo.-** Tiña ganas de dicirlle isto que lle vou a dicir e a verdade é que non llo dixen antes unhas veces porque rogos e preguntas non chegaron a tempo, outras veces por outras cousas. A verdade é que me chama moitísimo a atención que unha pérgola tan bonita como había na praza de Chavián, dun día para outro desapareceu e aquí ninguén da explicacións. Ou sexa, que en vez de manter o que nos deixaron, o mais fácil é coller, tiralo e acabouse. ¿Quéreme dar unha explicación de por que se tirou esa pérgola? Sabe onde lle digo, ¿non? Eu quixera que me dera unha explicación, o mesmo camiño vai a seguir a que

está ao lado do quiosco, xa o vexo, aquí en vez de manter as cousas deixámoas podrecer e entón como están podres, tiramos con todo, iso é o mais fácil.

**Trixésimo sexto rogo.-** Con respecto á chapuza, porque non ten outro cualificativo, que se fixo no solar que está detrás da Bodeguilla, eu díxeno aquí unha vez mais: o que se está a facer é unha auténtica chapuza. E sigo dicindo unha vez mais: ou se fai a cousa como Deus manda ou é mellor non facela. Cando se fai unha obra, tense que facer en condicións para non coller ao cabo dun ano ou menos e estar outra vez co mesmo problema. Esa é unha auténtica chapuza. ¿Por que é unha chapuza? Porque non se fan ben as cousas. Está aí para ver.

**Trixésimo sétimo rogo.-** Hai moita xente que vai á piscina de aquí de Bertamiráns e se queixan de que para certas actividades se queda moi pequena. Hai moita xente que non pode ir as actividades porque son tantos que non da abasto iso, ao mellor é que hai que estudar a posibilidade de que se poda aproveitar o terreo ese que hai enfronte á entrada da piscina.

**Trixésimo oitavo rogo.-** Abundando un pouco no que dixo Ramón García Argibay con respecto ao punto de luz que se lles sacou aos veciños de Guimaráns, mire alcalde: non cabe dúbida de que eu non teño pelos na lingua, nunca os tiven, e o que lle teño que dicir a un dígollo na cara, eu non ando por detrás. Iso me parece unha auténtica represalia a eses veciños e hai que caer ben baixo para facer o que vostede fixo. E se non o fixo vostede, permitir que se fixera iso, porque a min faimo e ao día seguinte esa farola xa non alumea mais. Non se pode ser tan malo, alcalde. Dúas vivendas que están a 150 metros da estrada onde neste tempo desde logo vaia vostede por alí e vaia a ver se realmente necesitan ter un punto de luz ou non. ¿E que lle supón a vostede un punto de luz alí? Dígame que mal lle fixeron eses veciños para sacarles ese punto de luz.

**Trixésimo noveno rogo.-** Entre a travesía da Peregrina e a seguinte ponte, ao largo do curso do río hai unha cantidade de buratos tremendo, aí onde están as hortas urbanas. Iso é un perigo constante, sobre todo para os rapaces, e mire que non hai rapaces aí. Eu creo que habería que botarlle man a iso.

**Cuadraxésimo rogo.-** Outro rogo que lle quería facer era se cabería a posibilidade de colgar na páxina web do Concello os horarios de autobuses.

**Cuadraxésimo primeiro rogo.-** Eu non sei a decisión que pode vostede tomar, pero creo que debo de dicir que antes de acabar este pleno deberíamos de ter un minuto de silencio pola morte de Adolfo Suárez.

Intervén o concelleiro **José Miñones Conde** para formular os seguintes rogos:

**Cuadraxésimo segundo rogo.-** En relación ás escolas deportivas, xa temos as actas das diferentes reunións que tivemos, tivemos tamén a comparecencia no mes de xaneiro e estamos á espera de que se convoque a comisión para as conclusións. Rogaría que se convoque canto antes a dita comisión.

**Cuadraxésimo terceiro rogo.-** Por outro lado, tamén en referencia ás escolas deportivas, pedimos por escrito diferente documentación que na comparecencia se dixo que se nos ía pasar e estamos á espera de que se nos dea esa documentación que aparece recollida na acta.

**Cuadraxésimo cuarto rogo.-** Presentamos un escrito este mes sobre a radio municipal, que se tratou tamén na comisión. Falamos da publicidade, do streaming, do enlace para escoitar a radio municipal a través de internet, e nos contestan que se fixeron unha serie de actuacións como foi anunciálo na páxina web ou mediante “novas” e mesmo na programación da radio, e eu rogaría que tamén a través das pantallas informativas que temos ao largo de todo o Concello e sobre todo tamén a frecuencia, xa que hai moita xente que aínda non coñece cal é a frecuencia da radio municipal.

Intervén a concelleira **Carmen Fraga Crespo** para formular os seguintes rogos:

**Cuadraxésimo quinto rogo.-** Algúns dos meus rogos xa os fixo o señor Emilio Martínez, pero quería insistir no arranxo da estrada que vai de Carballo a Salgueiro, porque onte estiven alí e aquilo está tremendo, non esaxera nada porque aquilo está cheo de buratos por todos os sitios, non hai como transitar por esa estrada. Por favor, hai que arranxala.

**Cuadraxésimo sexto rogo.-** Outro rogo pasoumo este mediodía xente que vive en Aldea Nova. Sería para revisar o alumeadado do aparcamento do centro ocupacional, que está acendido dende as seis ou seis e pico da tarde e habería que adaptalo ao horario solar actual. Outra cousa que me din é que aí hai un gasto excesivo de luz, que sería interesante quitar parte das farolas porque non serían necesarias tantas, hai moitísima luz e ademais dende moi cedo, é un gasto excesivo.

**Cuadraxésimo sétimo rogo.-** Outro rogo sería que recolleran en Trasmonte os sacos que deixaron cheos de follas no camiño que sobe ao campo da festa porque se hai un enterro ou calquera evento que haxa non se pode acceder porque hai dous sacos enormes de folla no camiño e levan alí moito tempo. Eu esperaba a que foran a recollelos, pero como non foron esperei a dicilo hoxe.

#### **Preguntas.-**

Intervén a concelleira **Susana Mallo Redondo** para formular as seguintes preguntas:

**Primeira pregunta:** Puidemos observar ao principio deste pleno que este mes o concelleiro de Educación leu a acta, a pena é que non a leu ata o final, porque se a lera ata o final decatárase de que unha vez mais incumprase as súas obrigas legais de responder ás preguntas e aos rogos que se lle fan no pleno; que non o faga durante a sesión é habitual, normalmente non ten a información ou non ten a capacidade de respondernos, pero ten que facelo por escrito a continuación no mes seguinte. E eu preguntei, agora non sei se foi pregunta ou rogo e non quero equivocarme nisto, pero si que me interesei pola información sobre os plans de intervención no colexio de Ventín, tanto na carballeira como no pavillón e pedín o proxecto e o calendario de actuacións, en que ían a consistir esas actuacións, e iso non se me respondeu. Tamén preguntei ou roguei, xa digo que non quero equivocarme, sobre as actuacións de mantemento que hai que facer nos centros, de que tanto alardearon alá en setembro dicindo, que foi certo efectivamente, que fixeron unha consulta a todos os centros de cales eran as súas necesidades. Desta consulta saíron unhas listaxes de solicitudes, cóstanos que moitas desas actuacións non se levaron a cabo, pero para ser rigorosos a pregunta foi ¿cales se acometeron e cales non? Por favor, déannos unha listaxe contrastada do que se solicitou e do que fixo o Concello. A miña pregunta actual aparte de reiterar iso, é: ¿Por que non me contesta ás preguntas, xa que está obrigado legalmente?.

**Segunda pregunta:** Que non vai a haber centro de saúde no Milladoiro por un tempo sabémolo perfectamente, e non é só unha cuestión de cartos. Obviamente o Partido Popular non incluíu nos orzamentos para este ano ningunha partida destinada ao centro de saúde. Cando o grupo parlamentario de AGA, a instancia de Ames Novo, intentou que houbera unha partida específica negáronse a que a houbese, e incluso non houbo “rubor” en despois da visita pomposa do noso alcalde ofrecendo alternativas de terreos á Xunta de Galicia e de manifestar publicamente nos medios de comunicación que “seguiran falando”. Entón temos o que temos, que é este ruinoso centro de saúde, no que hai que acometer intervencións moi urxentes, e as miñas preguntas son do mesmo estilo que sobre os centros educativos. Vostedes anunciaron que foron á Consellería de Sanidade cun informe de necesidades para ese centro de saúde. A Consellería de Sanidade, que os recibiu, tamén lles respondeu que o edificio é de titularidade municipal e polo tanto que lles toca a vostedes acometer eses arranxos, e eu quero coñecer ese informe é dicir, ¿cales son todas as necesidades que hoxe en día ten o centro de saúde e cando se vai acometer a súa solución?.

**Terceira pregunta:** Por último, sobre unha nova que houbo na web a raíz do pleno anterior. Curiosamente, no pleno anterior houbo unha queixa da oposición porque se reclamou determinada documentación na comisión da radio e a queixa foi que non se recibiu esa documentación nin esa información. E a nova do Concello recollía que o goberno dera cumprida información, ou sexa, absolutamente o contrario do que pasou e ademais está gravado. Unha cousa é non percibir ben as cuestións e outra cosa é dicir todo o contrario ao que a oposición di aquí, que me parece cando menos delicado. Entón a miña pregunta é: ¿está o alcalde ou algún membro do goberno ditando as notas de prensa ao persoal que se ocupa da web municipal? Non teño mais preguntas.

Intervén o **alcalde** para dicir: Non ditamos as notas de prensa, puido ser un erro ao mellor que se cometeu. No tema do mantemento do centro de saúde do Milladoiro, no día de onte aínda estivemos no centro de saúde co director da área sanitaria de Santiago e cunha subdirectora de recursos, para que viran aquilo que nós lles dixemos e para buscar esa solución que garanta que os problemas de humidades e de filtracións se solucionen. Vostede dicía ben, agora mesmo o Concello ten que facer o mantemento do centro de saúde, pero entendemos que hai unha parte que excede dese mantemento, como é reparar ou levantar ou facer unha nova cuberta, que é o que lle estamos agora mesmo pedindo á Consellería de Sanidade que efectúe. Xa lle digo, onte tivemos unha visita ao centro e seguirei informando a medida que vaíamos dando os pasos.

Intervén **Bernardo Moar Míguez** para dicir: Eu tamén teño que facer un rogo, e é que se lea vostede tamén as actas porque é certo que me preguntou no mes de febreiro e tamén é certo que no mes de xaneiro lle respondín. Contesta **Susana Mallo** : Non me puido responder antes de que lle preguntara. Intervén **Bernardo Moar** para dicir: ¡É que me fixo a mesma pregunta no mes de xaneiro! ¡Léase as actas dona Susana! Intervén **Susana Mallo** para dicir: Non lle fixen a mesma pregunta, pero non se preocupe que lla sigo facendo. ¡E o mes que ven mercadillo!

Contesta **Bernardo Moar** para dicir: Si, o mes que ven vamos a ter mercadillo.

Intervén **Olalla Alvite del Río** para dicir: Si, je que mercadillo! Falaremos do tema.

Intervén **Bernardo Moar** para dicir: O mes que ven.

Intervén o concelleiro **Xosé Anxo Doval Rey** para formular as seguintes preguntas:

**Cuarta pregunta:** A verdade é que eu tiña dous rogos, pero me quedei un pouco traspapelado con que non permitiran restaurar, ou polo menos falar, da memoria dunha Corporación tan democrática alomenos coma a nosa. Eu vou transformar algún dos meus rogos en preguntas. A primeira é referida a unha solicitude dunha entidade deportiva deste Concello realizada a mediados do mes de xuño e estamos no mes de marzo e aínda non foi contestada por este Concello, por esta Alcaldía. É referido a algo tan importante como o inicio da xestión para dotar dunha cidade deportiva, 10 meses despois iso está aínda no aire, non sei as consecuencias que iso pode ter referido, por exemplo, a acordos que tivera con algún dos propietarios das parcelas nas que o tiñan que facer e a día de hoxe me consta que algunha delas xa se volveu atrás. Pero iso pasa con moitas cousas neste Concello, a inacción acaba prexudicando non ao Concello, senón aos seus veciños. A pregunta é: ¿Van a seguir así, sen contestarlle, e polo tanto sen ter clara cal é a opción deste Concello? E dicir, cidade deportiva do Aeroclub, unha entidade que non é de Ames, todo para adiante e todo facilidades, e a deportiva de Bertamiráns “deixa estar aí, que total para que”. A pregunta é: ¿Vanlle a contestar? E se lle van a contestar, ¿en que termos no referido á solicitude que hai feita?.

**Quinta pregunta:** A segunda cuestión que quería falar é sobre as escolas deportivas, moi breve porque antes xa fixo un rogo Miñones, pero a maiores recordar que ao final desa acta eu dicía que solicitaba unha nova reunión da comisión para chegar ás conclusións pertinentes e que foran



presentadas a este pleno. Esa reunión non se celebrou e eu preguntolle cando se vai celebrar esa reunión?.

**Sexta pregunta:** A terceira pregunta é referida á recente convocatoria de subvencións para asociación culturais e comisións de festas. Farei a pregunta despois, pero quero comentar que digamos que certifica algo que veño continuamente falando. Por certo que vamos adiantando e gañando meses nas convocatorias o cal é bo, pero resulta que dan de prazo ata o 15 de xaneiro do ano 2015 para xustificar os gastos do 2014 e que incluso se pode ampliar ata o 31 marzo do ano 2015. Claro, se iso fora que aqueles que se retrasan non van a cobrar, porque é culpa deles, ata aí estaría ben, pero resulta que eu xustifico no mes de agosto e hai dous meses para que resolva o Concello despois de finalizado o prazo, e non vou cobrar hasta o mes de marzo, abril, maio do ano que ven. É irracional, e non só irracional, senón que están ,e volvo a repetir, cravándonos nos bolsillos de aqueles que facemos algunha actividade. Despois alguén vai a comentar que porque estes non poden esperar a cobrar. A min é que me fai gracia que neste Concello intentamos pagar en 6 meses, o Concello si. Os veciños ou aqueles que están nas asociacións culturais non, eses xa pagaran aínda que sexa dentro dun ano, non pasa nada. Entón a pregunta é: ¿Van a pagar inmediatamente ás asociacións que xustifiquen? Porque pódeno facer, a convocatoria non di que non. A pregunta, por favor, pido que me contesten, xa que nunca me contestan a nada, isto pido que me contesten, se van a pagar inmediatamente ou un mes despois, unha vez feitos os trámites oportunos, de xustificación e non esperar a que todas xustifiquen a 31 de marzo do ano que ven. Esta é a pregunta.

**Sétima pregunta:** Voulle preguntar ao respecto da Conta Xeral. ¿Que día é hoxe? 27 de marzo. A non ser que nestes próximos días presenten as contas, un ano mais incumprirán os prazos, por moito que diga vostede todos os anos que cumpren os prazos. Non cumpren os prazos, porque o 31 de marzo teñen que estar presentadas as contas, e a non ser que as presenten nos próximos días, se é dentro do próximo mes lle aseguro que retirarei as miñas palabras, non volverán a cumprir os prazos. Pero ademais este ano vai a ter, ou espero que non vaia a ter un problema, porque cando se xustificaba que no mes de setembro presentaba e cumpría, claro, porque así tiña a posibilidade de cobrar a subvención estatal no mes de outubro, este ano lle advirto que é en xuño. Para que o teña en conta, simplemente.

Intervén o **alcalde** para dicir: Moi ben, moitas grazas. Miraremos iso das bases das convocatorias. O que si lle podo dicir é que esa asociación deportiva que quere facer unhas pistas de pádel en Bertamiráns está ao corrente de todos os pasos que se están dando dende o concello para buscar unha solución.

Intervén **Anxo Doval** para dicir: Pero presentou un escrito e vostede ten 6 meses de prazo para contestarlle, ¿e van 10! Continua o **alcalde** dicindo: Perdón, déixeme falar. Cos promotores se ten falado en varias ocasións e se vai a volver a falar proximamente e cando lle comuniquemos aos promotores cal é a situación debido aos problemas legais que se atopan llo diremos.

Intervén a concelleira **Olalla Alvite del Río** para formular as seguintes preguntas:

**Oitava pregunta:** Antes de empezar coas preguntas que tiña previstas vou a recoller unha de Susana Mallo: ¿Vostede como responsable de comunicación revisa o que se publica na web?. Contesta o **alcalde** dicindo: ¿Se reviso? ¿Que quere dicir vostede con que se reviso?.

Continúa **Olalla Alvite** dicindo: Se revisa o que se publica na web e se leva o control. É unha competencia mais que ten vostede. Contesta o **alcalde**: A min pásanme as notas e se soben á web. Continúa **Olalla Alvite**: Revisao. ¿E non se percatou dese fallo? Ben, vou coas preguntas que tiña previstas.

**Novena pregunta:** Son preguntas debido á revisión dos decretos da Alcaldía que tivemos para este pleno. As primeiras mais que nada son por curiosidade, porque non sei para que é

este gasto, gustaríame sabelo, vai para Alfredo. Son unhas facturas, dúas, que no mes de xaneiro suman 5600 e pico euros de aluguer de vehículos para a brigada de obras. É por curiosidade ¿para que se alugan eses vehículos?. Contesta o concelleiro de Vías, Obras, Parques, Xardíns, Patrimonio e Urbanismo **Alfredo Taboada Alvelo** : Están alugados, claro, porque lles fan falta e por iso se alugan. Pregunta **Olalla Alvite**: ¿Mensualmente págase o aluguer deses vehículos? Contesta **Alfredo Taboada**: Pero non son 5.000 e pico euros. Continúa **Olalla Alvite**: Si, si, hai unha factura de 3630 e outra de 1999 euros.

Intervén o **alcalde** para dicir: Hai varios vehículos alugados que veñen de fai tempo.

Continúa **Olalla Alvite**: Pero estes son vehículos da brigada de obras, segundo poñen nas facturas. Intervén o **alcalde**: Non sei, non lin a factura pero hai varios vehículos alugados. Intervén **Olalla Alvite**: ¡Vostede aprobouna!. Intervén **Olalla Alvite** para dicir: Unha é de 3630 e outra de 1999. Quero dicir, revisando os decretos da Alcaldía chamáronme a atención, non sei se é mensualmente, se mensualmente se está pagando iso de alugueiro de vehículos. Igual por xestión eficaz habería que plantexarse mercalos. Intervén o **alcalde** para preguntar: Serán varios vehículos, ¿ou é un solo?. Intervén **José Miñones** para dicir: Unha de 3.630 euros ven coa matrícula do coche e a de 1.999 euros ven con outra matrícula. Nós pensamos que se trataba dalgunha actuación puntual, non que era o aluguer do mes a mes. Intervén o **alcalde** para dicir: Ten que ser varias facturas. Continúa **Olalla Alvite**: Logo, hai outras dúas facturas co mesmo concepto, aluguer de maquinaria, retroescavadora, brigada de obras, cooperación de espazos rurais, en decembro ascende a 4.392 euros, e en xaneiro a 3.593 euros, é curiosidade, ¿isto que é?. Contesta **Alfredo Taboada**: Foi para a brigada que mandaron na que había un palista e alugouse tamén un camión, dentro dese convenio. A ver se estes son dunha desas porque veu a pala e mais o camión. Non o sei agora mesmo.

Intervén o **alcalde** para preguntar: ¿Me pode dicir o numero de decreto e así mañá dámoslle unha contestación mais concreta?. Intervén **Bernardo Moar** para dicir: O da maquinaria foi para o plan de cooperación. Intervén **José Miñones** para dicir: E o vehículo probablemente tamén o alugaredes para iso, por iso nós o dicimos. Intervén **Olalla Alvite** para dicir: Non, nesta outra factura da cooperación especifica: "brigada de cooperación", o outro non especifica nada.

Volve intervir o **alcalde**: Dinos o número de decreto e mañá miramos. Intervén **Olalla Alvite** para dicir: Vale, busco o numero de decreto. Intervén o **alcalde** para dicir: Se non é agora, pois despois ou mañá. Intervén **Alfredo Taboada** para dicir: Cando sexa, non ten porque ser agora, mirámolo.

Continua **Olalla Alvite** dicindo: Nos mesmos decretos de facturas, veñen unhas facturas dos diferentes servizos contratados para a Cabalgata de Reis. Hai facturas que sorprenden, pero eu nunca organizei unha Cabalgata de Reis, pero se o aluguer dos traxes de paxes custan 1.800 euros, a min chámame a atención, porque son por un día. Aparte diso, o que me chamou a atención é que hai dúas facturas nas que o concepto é exactamente o mesmo: "*servizo de escenografía, estrutura, equipamento de son, equipamento de alumeado e persoal técnico para Cabalgata de Reis do Milladoiro organizada pola Concellaría de Cultura*". As dúas facturas din exactamente o mesmo, as facturas teñen o mesmo importe 2.612,40 euros, pensei que sería un erro e que estaría duplicada pero non, porque unha é a factura 1400343 e a outra a 1400344.

Intervén **Eugenia Martin Vicente** para dicir: Una es la de Milladoiro y la otra es la de Bertamiráns, así de fácil. Continúa **Olalla Alvite** dicindo: ¿E como non pon nada e non se especifica? . ¿Unha é de Milladoiro e outra é de Bertamiráns?. Intervén o **alcalde** dicindo: Si, debería de ser así. Intervén **Olalla Alvite** para dicir: Está mal. Eu pensei que se duplicara. Ao ser a mesma empresa. Vale, esas eran as miñas curiosidades.

**Décima pregunta:** Teño outra pregunta. Como a radio xa retransmite en estreaming, gustaríame saber se teñen prevista, como falamos noutras ocasións, a retransmisión dos plenos.

Pregunta o **alcalde**: ¿Acabou as preguntas?. Contesta **Olalla Alvite**: Si, ¿e vostede as respostas? Contesta o **alcalde**: Cando llas poda dar, llas darei.

Intervén a concelleira **Pilar Candocia Pita** para formular as seguintes preguntas:

**Décimo primeira pregunta:** Caramba, que difícil esa resposta, entón a miña xa non sei. É para a concelleira de Igualdade. Con motivo do 8 de marzo, día Internacional da Muller, o Concello por primeira vez fixo unha campaña sen contar cos grupos. E digo por primeira vez porque que eu saiba antes non había ningún acto, polo menos non desde o 1999 que eu estiven aquí, pero a partir 2003 se fixeron actos e sempre a oposición, fose quen fose, tivo a capacidade de falar nese acto e de dicir a súa opinión ata o ano 2011, incluído ese ano porque nós tomamos posesión neste mandato despois do 8 de marzo. Despois cando estivo como concelleira de Igualdade María González sempre se pactou o acto do 8 de marzo e do 25 de novembro, sempre se pactou o acto. Por primeira vez, desgraciadamente, ese día parece que é un día solo para o goberno, non é un día de toda a Corporación. Pero non é diso do que quero falar, pero de paso aproveito tamén para dicilo. A campaña chamábase algo así como "Ames pon nome á igualdade". Xa dixemos e reiteramos que a igualdade xa ten nome; o que precisa son recursos, capacidade e conciencia, nada mais. Nome xa ten, igualdade. Aquí existía un departamento, creo que sabe moi ben a concelleira Isabel García Canela que foi responsabilidade dela e despois de moitas mais, pero foi ela con quen empezou un departamento de igualdade que tiña persoal, non vou especificar todo o persoal porque ao mellor tamén a min se me esquece algún. E agora se fai unha campaña a bombo e platillo do 8 de marzo para poñerlle nome á igualdade para convertelo en CIM. A min impórtame un comino que o departamento se chame CIM ou *fan* ou *fun*. O que eu pregunto e supoño que agora non me vai poder responder pero se fai o favor no prazo dun mes como di a normativa prégolle que me conteste as seguintes: A primeira: ¿O paso a CIM supón un incremento de recursos? A segunda pregunta: ¿Canto persoal a maiores achega a Xunta ou ten o Concello para este servizo?. A terceira pregunta é: ¿Que melloras vai a ter este servizo a respecto do que había anteriormente? Mais nada.

Intervén o **alcalde** para dicir: Moi ben, moitas grazas. Contestarémolle por escrito.

Intervén o concelleiro **Manuel J. Ferreiro Santiago** para formular as seguintes preguntas:

**Décimo segunda pregunta:** ¿Cando se van a pagar os convenios deportivos, co Bertamiráns, o Milladoiro e o Bruxas? Porque me consta que algún deses equipos o esta pasando mal nos últimos tempos. Contesta **María Eugenia Martín**: Cuando presenten las facturas, basicamente. Intervén **Manuel Ferreiro** para dicir: A min me consta que entregaron unha factura no mes de xaneiro. Contesta **María Eugenia Martín**: El único que la había presentado era el Bertamiráns y hubo que rectificarla.

**Décimo terceira pregunta:** Outra pregunta para o concelleiro de obras: na zona de Lapidio asfaltouse ata a ponte e os veciños preguntan: ¿Se vai a asfaltar dende a ponte ata o lugar de Maguxe? Contesta o concelleiro de vías, obras, parques, xardíns, patrimonio e urbanismo **Alfredo Taboada Alvelo** dicindo: Creo que si, creo que está metido.

Intervén o concelleiro **Ramón García Argibay** para formular as seguintes preguntas:

**Décimo cuarta pregunta:** Boas noites. Vou facer a lectura dun escrito e logo farei a pregunta. Falo en nome, supoño, de todos os concelleiros que antes falamos deste tema. O escrito di así:

*"Carlos Rivas Miranda como responsable de la asociación de fiestas de Milladoiro y como vecino de Milladoiro expongo: Que el pasado 19 de marzo fui sometido a una persecución personal, como si de un delincuente se tratara. Me explico: con fecha 1 de marzo se presenta solicitud de corte de la calle Costa Grande para celebrar las fiestas de nuestro patrón San José. Con fecha 14 de marzo recibo un escrito firmado por don Santiago Amor Barreiro, alcalde de nuestro excelentísimo Ayuntamiento, en el que se informa favorablemente dicho corte pero que se tienen que cumplir una serie de normativas de la que se da cuenta a los miembros de la oposición y que estos expondrán.*

*A parte de esto, el Ayuntamiento viene cobrando el uso del suelo público a las atracciones, a*

*excepción del verano del 2012, que fue esta asociación quien depositó una cantidad a tal efecto. En este caso, 2014, fue el Ayuntamiento quien dio las autorizaciones pertinentes, cometiendo demasiados errores con personas autónomas que estaban debidamente dadas de alta y a las que no se les permitió desarrollar su trabajo con los consiguientes prejuicios. En el caso de las atracciones de la plaza Costa grande y urbanización Figueira ocurre lo siguiente: es una zona que está sin recepcionar por parte del Ayuntamiento, o sea, tierra de nadie, pero la Policía Local ordena el levantamiento de las mismas. Primero: Al no admitirle la Concellería documentación de las solicitudes del 11 de marzo para la instalación de un aparato de cadenas. Segundo: Sin embargo, sin avisar la solicitud que da de los hinchables que después se instalan en un lugar con muchísimo mas peligro, al invadir un paso de peatones. ¿Donde está Medio Ambiente cuando se permite la construcción de unos edificios encima de un regato en una zona que se inundaba con mucha frecuencia todos los inviernos? ¿Hasta cuando esta zona estará sin recepcionar? ¿Por qué se cuidan los jardines por personal del Ayuntamiento? Si vamos a exigir que se cumpla la ley, esta es para todos. Llevo 25 años organizando las fiestas del Milladoiro. Han pasado don José Astray, don Carlos Fernández y don Xose Manuel Fernández y todos ellos han puesto todo de su parte para que las fiestas de Milladoiro fueran unas de las mejores de la comarca.*

*Esta asociación ya se ha puesto a trabajar para las fiestas de la Magdalena y le comunicará a los vecinos que este año el presupuesto se verá mermado, ya que no quieren que le pase lo mismo que a la Asociación cultural A Magdalena que aun no se les contesto el escrito de fecha 8 de febrero de 2012, en el que se adjuntaban las facturas que cumplían unas bases de la convocatoria y tampoco espectáculos Lito tiene que esperar al 21 de julio de 2013 a cobrar el trabajo realizado en agosto de 2012, se cobran las subvenciones dicho día para las fiestas celebradas. Probablemente don Santiago Amor estaría mas feliz al repetir la foto del 19 de marzo del 2013 a las 20:30 horas estando solos él y el concejal don Alfredo Taboada en la acera saludandose mutuamente enfrente a la iglesia parroquial. Lo que firmo en Ames, a 27 de marzo de 2014”.*

La pregunta que podemos hacer es: ¿Usted va a ponerse en contacto con esta persona para intentar solucionar na medida do posible todo o que está expoñendo neste escrito? No sei se alguén quere intervir. Intervén **Pilar Candocia** para dicir: O que facemos sempre cando un veciño transmite unha queixa é pasala, pero é que neste caso xa viñera antes por aquí e xa se falara. Intervén o **alcalde** para dicir: Falaremos con el. Intervén **Pilar Candocia** para dicir: É triste que teñan que vir estas cousas ao pleno, alcalde, que non sexa vostede capaz de resolvelo. Intervén o **alcalde** para dicir: ¿Nos podía despois facilitar copia do escrito?. Intervén **Ramon García Argibay** para dicir: En calquera caso, o mellor é que se poña en contacto. Contesta o **alcalde**: Se autoriza a persoa, claro.

**Décimo quinta pregunta:** Na Xunta de Goberno, no punto sétimo se recolle: Execución do plan especial de dotacións da cidade deportiva do Real Aeroclub de Santiago en Ames, inaplicabilidade da condición de indivisibilidade da segregación de terreos a permutar. En definitiva, despois de todo o que se expón nesa Xunta de Goberno se acorda precisar o acordo adoptado pola Xunta de Goberno Local do 14 de xuño de 2013, corrección de erros do 6 de febreiro de 2014, polo que se autorizou a xeración das porcións de terreos propiedade do Real Aeroclub de Santiago con destino aos novos tramos de viais públicos para a posterior permuta do Concello coa citada mercantil propietaria da parcela antes segregada, co fin último de adaptar os camiños existentes ao trazado do sistema viario previsto no Plan especial de dotacións da cidade deportiva do Real Aeroclub de Santiago, no senso de que a dita segregación non se atopa afectada pola condición de indivisibilidade que aínda consta no Rexistro da Propiedade polas razóns expostas no informe da asesora xurídica de Urbanismo de data 11 de marzo de 2014. A cuestión é, nin mais nin menos, que debe haber unha incompatibilidade entre a normativa antes e despois da aprobación do Plan especial. Aquí faise referencia a unha serie de cuestións e se fai un informe xurídico e polo tanto me gustaría preguntarlle se nos pode facilitar copia dese informe xurídico e ademais desa corrección de erros, así como dos últimos escritos presentados



relacionados co Rexistro como polo tema do Aeroclub, esa é unha pregunta. A segunda pregunta sobre este tema é se nos pode proporcionar tamén a reparcelación da zona.

**Décimo sexta pregunta:** ¿Vostede ordenou a retirada da farola de Guimaráns número 5? ¿Quen ordenou cortar a luz desa zona? .

**Décimo sétima pregunta:** ¿Cando vai arranxar a pista de Firmistáns, que agora mesmo ten incluso unha valla que impide o paso? .

**Décimo oitava pregunta:** ¿É consciente vostede de que o outro día na paxina web se publicou a orde do día do pleno e se omitiu na web o punto da orde do día da moción que presentamos os concelleiros de Pacto x Ames? ¿É vostede consciente diso? ¿Por que se fixo? ¿Por que se omitiu ese punto da orden do día dun pleno, no que é un punto da orde do día mais?.

**Décimo novena pregunta:** Fai pouco mais dun mes presentamos un escrito solicitando á conselleira de Sanidade unha audiencia para expoñerlle cal era a situación do centro de saúde do Milladoiro. Nese escrito o que pretendíamos, nin mais nin menos, era que como por parte do Concello non había ningunha información e ademais un descoñecemento claro, intentamos que nos dera unha aclaración a conselleira sobre todo en canto á construción do novo centro de saúde. Recibida onte, pero con data de 17 de marzo de 2014, temos comunicación de Antonio Fernández-Campa García-Bernardo, secretario xeral técnico da Consellería de Sanidade, que contesta, ou nos contesta neste caso, o seguinte: *“Estimado señor García Argibay: Pola presente acusamos recibo da súa petición de audiencia coa conselleira de Sanidade da Xunta de Galicia para tratar temas relacionados co centro de saúde do Milladoiro. Recentemente a conselleira de Sanidade mantivo unha reunión con don Santiago Amor, alcalde do Concello de Ames, na que se trataron os temas aos que vostede fai referencia no seu escrito. Por tal motivo, entendemos que institucionalmente parecería mais adecuado que a información relativa a este tema lle puidera ser facilitada dentro do ámbito propio do Concello. Agradecemos, non obstante, o seu interese por este asunto. Atentamente.”*

A pregunta é: ¿Vai vostede a dar a información cumprida desa reunión, tal e como nos informa o secretario xeral técnico da Consellería de Sanidade o señor don Antonio Fernández-Campa García-Bernardo?. Intervén o **alcalde** para dicir: Moi ben, ¿rematou as preguntas?.

**Vixésimo pregunta:** Retomando un pouquiño o que dicía dona Pilar antes, en canto as cuestións psicolóxicas, eu vou a ser mais directo: ¿Vai a convocar a comisión para tratar o tema do ROM, Regulamento Organización Municipal? .

**Vixésimo primeira pregunta:** E unha pregunta que lle estou facendo pleno tras pleno e que vostede non contesta, como soe ser habitual. En decembro do ano 2012, tres concelleiros que tiñan daquela dedicación, presentaron por escrito a súa renuncia a cobrar a paga extra, dona María, don Manuel e mais eu, e doábamos esa paga extra a asociacións benéficas, culturais, etc. ¿Pensa vostede contestarnos a ese escrito ou do contrario vai a facer vostede o pago desa cantidade de cartos a esas asociacións? Creo que debe ser a enésima vez que llo preguntamos, xa vai alá mais dun ano, e considero que dunha vez por todas debe dicir vostede se vai a facer o que di o escrito que presentamos os concelleiros para doar esas cantidades ou non, ou polo menos dar unha explicación a estes concelleiros de se se vai a facer ou non se vai a facer. Nada mais grazas.

Intervén o **alcalde** para dicir: Moi ben, moitas grazas. Pois a aquilo ao que lle poda contestar, lle contestarei.

Intervén **Emilio Martínez Carballeira** dicindo: Eu en vista do que acaba de dicir non sei se tamén facerlle preguntas. Intervén **José M. Miñones** para dicir: Sí, é a túa obriga, e é obriga del a de contestar. Intervén o **alcalde** para dicir: Eu contestarei ao que poda, señor Miñones. Intervén **José Miñones** para dicir: Ao que queiras, poder podes contestar ao que queiras. Intervén o **alcalde** para dicir: Aquí non.



Intervén **Emilio Martínez Carballeira** para decir: Aquí fanse cantidade de preguntas pero é como se non se fixera nada. Intervén **Pilar Candocia Pita** para decir: Non so é aquí, é que tampouco as contestan despois. Intervén **José Miñones** para decir: Levamos 17 preguntas sen contestar agora mesmo. Intervén **Ramon García Argibay** para decir: ¡Nos temos centos! Intervén **José Miñones** para decir: Neste pleno levades 17 preguntas polo momento.

Intervén o concelleiro **Emilio Martínez Carballeira** para formular as seguintes preguntas:

**Vixésimo segunda pregunta:** Unha das preguntas, volvo a repetir unha vez mais, debe de ser a vixésima vez que a fago, os de Ortoño desde logo poden estar tranquilos de que non será porque non se lle di. Volvo a recordarlle o paso de peóns do cruce de Ortoño: ¿vaise a facer ou non se vai a facer? ¿Quen manda, Alfredo ou o alcalde?. Contesta o **alcalde** dicindo: É un tema que leva el, é dicir, eu podo preguntarlle a el. Intervén **Alfredo Taboada** para decir: Esa estrada é da Deputación, xa se mandaron á Deputación non sei cantos escritos: cada vez que mo dis ti mando unha carta para alá. Din que é mais perigoso pintar o paso de peóns aí que non pintalo. Esa é a contestación que me dan eles. Intervén **Emilio Martínez Carballeira** para decir: Eu esa contestación a quixera ter por escrito, porque non vaia a ser que pase algo; ese é un cruce perigosísimo e non o digo eu, senón que o din os que viven alí, que en calquera momento vaia a pasar o que pode pasar e despois veñen as lamentacións. Eu quixera que esa reposta que ma fixeran por escrito.

**Vixésimo terceira pregunta:** ¿Ao día de hoxe faloron cos propietarios da leira-parking para darlle unha solución definitiva dese gran problema que vimos arrastrando dende fai anos?.

**Vixésimo cuarta pregunta:** Vou preguntar algo que me dixeron mais de dous veciños, que é que se rumorea que se vai a quitar o servizo de urxencias do centro medico de Bertamiráns. ¿Me pode dicir que hai de certo disto?. Contesta o **alcalde** : Non teño constancia de que se vaia a quitar ese servizo medico de urxencias, senón mo dirían no día de onte, pero non teño constancia. Aínda así preguntarei, pero non teño constancia de que se vaia a quitar o PAC, ¿a iso se refire vostede? Que eu saiba, non.

**Vixésimo quinta pregunta:** Por último, volvo a insistir unha vez mais, sobre todo a ver se é que realmente ten un pouquiño de sensibilidade. Agora non é o caso porque non é o momento de levalo a cabo, pero unha vez mais de tantas, llo vou a recordar: ¿Será posible que poidan os nosos maiores contar cunha área de exercicios, cos elementos que conleva e todo o demais, para que podan facer os seus exercicios como hai noutros concellos?. Contesta o **alcalde** dicindo: Xa temos unha memoria feita, se quere lla facilito. Pregunta **Emilio Martínez**: ¿Pero vai a ser posible este ano? Contesta o **alcalde**: Si, si, a idea é esa. Intervén **Emilio Martínez** para decir: Pois ademais de agradecerllo eu, vanllo agradecer mais os nosos vellos. Nada mais.

Intervén o concelleiro **José Miñones Conde** para formular as seguintes preguntas:

**Vixésimo sexta pregunta:** En primeiro lugar, xa saíron varias das cuestións pero non por iso imos deixar de preguntar, porque a moitas delas tampouco se respostou. En referencia á páxina web, creo que todos os concelleiros da oposición preguntamos sobre este asunto da paxina web e eu xa preguntei tanto o mes pasado como o anterior, sobre quen colgaba as novas na paxina web. Vostede daquela me dixera que nalgunhas ocasións as colgaba o técnico correspondente e noutras o persoal de confianza. Gustaríame saber: ¿O persoal de confianza ten a potestade e a autorización para colgar na paxina web institucional novas? Iso en primeiro lugar.

**Vixésimo sétima pregunta:** En segundo lugar, en referencia precisamente á nova que aparecera na web sobre a radio municipal que teño aquí diante, na que se dicía precisamente que se achegara aos membros da comisión ampla documentación desa comisión e mesmo despois se di que o executivo amiense é consciente da necesidade de potenciar a radio municipal e está dando os pasos para acadalo, nun momento económico no que a cidadanía amiense reclama outras actuacións mais prioritarias. Gustaríame saber: ¿Quen foi exactamente a persoa que colgou esa

nova referente á comisión da radio?.

**Vixésimo oitava pregunta:** En referencia tamén á comisión da radio, desa mesma comisión que foi convocada un ano despois da anterior, e na que se nos entregou certa documentación que fora xa entregada no mes de xuño do ano anterior, foi en febreiro creo recordar esa comisión da radio polo tanto 9 meses antes xa tiñamos a documentación que se nos deu e a única documentación nova era un orzamento para a cobertura da radio, do cal non nos deu copia no momento, porque lla acababan de entregar, segundo dicía vostede nesa comisión. Para a cobertura da radio, con esa instalación ou infraestrutura, vostede dicía que chegaba para dar a todo o concello a cobertura correspondente de Radio Ames. Gustaríame saber: ¿Fíxose xa algunha actuación nesa liña e se está instalando entón xa esa antena para dar cobertura? E senón, ¿para cando teñen vostedes pensado facer esa actuación?.

**Vixésimo novena pregunta:** Noutro orde de cousas temos un escrito dunha veciña do 20 de febreiro de 2014, é dicir deste ano, onde pide que se revisen as árbores que están próximas ao colexio Alca, que teñen unha altura bastante considerable e adxunta a fotografía. Non sei se xa fixo algún tipo de actuación alí e sobre todo se se lle contestou á persoa. Porque pedía e daba o número de teléfono para que se puxeran en contacto con ela e como era de febreiro pois para saber se se falara.

Contesta **Alfredo Taboada Alvelo** dicindo: Aínda estiven con el onte, con José Manuel. Con ela non falei, falei con el.

**Trixésima pregunta:** Co que sexa, é o mesmo. Outra pregunta, varios veciños, sobre todo asociacións, nos trasladan que teñen escritos sen contestar, lles pasa como a nós, pero nalgún caso das asociacións están a falar de mais dun ano. Entón nos pediron que preguntáramos: ¿por que non lle dan contestación a estes escritos? E pedíronnos que lles rogáramos que o fixeran canto antes. Neste caso concreto é a asociación de Oca e tamén temos a denuncia da asociación de Covas, polo tanto, teñen escritos pendentes, pedímoslle copias para que nolos deran e así poderllo trasladar novamente, pero queríamos saber por que non se lle da contestación a eses escritos de mais dun ano.

**Trixésimo primeira pregunta:** Correspondente ao plan de obras da Deputación, onde o concelleiro nos pediu un listado de obras que nós queríamos meter. Gustaríame saber se o van a traer para o seguinte pleno porque entendíamos que como o pediron con tempo suficiente ía para este pleno, pero non sabemos si houbo algún problema, ¿vai para o seguinte pleno, entón? ¿Teñen pensado facer algún tipo de reunión previa?.

Contesta **Alfredo Taboada:** Si, faremos unha reunión.

**Trixésimo segunda pregunta:** En referencia ás pantallas, fixen unha pregunta o mes pasado pero que xa viña de 6 meses antes, sobre a pantalla que está ubicada na Casa da Cultura de Bertamiráns que estaba apagada e segue apagada. Gustaríame saber, ¿por que está apagada? No pleno anterior fixen un rogo dicindo que o mirasen, agora gustaríame saber ¿está estropeada esa pantalla e non se arranxa ou simplemente non se lle da ao botón para que se acenda? Precisamente son pantallas informativas, cousa é o que se está a colgar nesas pantallas e se alguén está a facer ese mantemento, porque aínda seguen colgadas novas de hai tres anos nas que estaba o anterior goberno.

**Trixésimo terceira pregunta:** Con referencia JUPEMI tamén lles roguei o mes pasado se podían mandar un técnico informático para que lles mirasen os equipos informáticos que teñen alí e díxome que o miraría. Gustaríame saber: ¿Deron orden ao departamento correspondente ou non?.

**Trixésimo cuarta pregunta:** Sobre o tema do regulamento, xa saíu en varias ocasións, xa temos diferentes posicionamentos dos concelleiros, e preguntamos tamén no pleno pasado por que non se convocaba a comisión do regulamento, se no mes de xaneiro nos pediu aos grupos que formabamos parte da comisión que deramos as nosas aportacións; nós as fixemos ao día seguinte e seguimos esperando dous meses e medio despois a que se

convoque esa comisión, non sabemos por que non se convoca a comisión. No escrito que vostede nos mandara no seu día dicía que era porque faltaban as aportacións do resto dos concelleiros ou dalgúns dos concelleiros que estaban nesa comisión e xa lle dixemos no pleno anterior que iso non é condición para que non se convoque a comisión, porque xa hai antecedentes de convocar comisións sen ter as aportacións dos grupos municipais ou dos concelleiros non adscritos. Polo tanto, gustaríame saber: ¿Por que non convoca esa comisión do regulamento, que permitiría que ao mellor xa tiveramos acabado por exemplo este pleno, porque se limitaría precisamente o numero de rogos e preguntas, entre outras moitas cousas?.

**Trixésimo quinta pregunta:** En referencia ao tema da licitación da auga, tivemos unha reunión xa hai un mes e medio, creo recordar, e sabemos que é un tema urxente, que remata en setembro a prórroga que está levando Espina e Delfín e que mesmo nesa comisión se presentaban xa unha serie de alternativas ou de estudos que se ían a mirar e estaban pendentes simplemente, segundo entendemos nós, dunha chamada telefónica para que nos aclararan certos puntos. Non entendemos que un mes e medio despois seguimos sen ter nin unha soa nova sobre o tema de licitación de auga. ¿Que é o que está a pasar? ¿Que pasou con esa empresa de Coruña? ¿Se puxeron vostedes en contacto? O que preguntamos é para que informen ou convoquen a comisión para dar conta da información de todo o que esta acontecer, e se falou naquela comisión, que os prazos ían xa mal e xa estabamos fora de prazo en moitas das alternativas, ¿como nos podemos permitir o luxo agora de perder un mes e medio mais? Non sei cal é o plan deste goberno en referencia ao tema da auga.

**Trixésimo sexta pregunta:** Por ultimo, o tema do centro de saúde, que tamén saíu aquí. Nós no pleno anterior e aínda mais, na comisión do pleno anterior, fixemos unha proposta que trasladamos ao goberno para que non se perdera ningunha das dotacións, nin o centro de saúde, nin o parque de bombeiros. Non temos contestación ningunha sobre esa proposta. A pregunta é: ¿Vostede mirou esa alternativa de que se leven alí as dúas infraestruturas? ¿É posible que a cesión que se ía facer para a igrexa se leve a outra parcela que existe no Milladoiro? ¿Fixo algún tipo de movemento ou de solicitude ao departamento de Urbanismo para que lle informen sobre este asunto?. Gustaríanos saber que tipo de actuacións fixo vostede en relación a esa proposta que nós fixemos. Despois nos atopamos que a contestación da Xunta veu a través da prensa, unha vez mais, cun titular da conselleira que di que non se vai a facer ese centro de saúde, que non existe orzamento, cousa que nós, como xa dixeron antes os compañeiros de Ames Novo, tamén fixemos vía parlamentaria unha emenda e foi votada en contra polo Partido Popular a nivel galego. Pero sabendo que non existen eses orzamentos, tamén sabiamos que existían outras posibilidades. O que mais nos preocupa de todo este tema do centro de saúde e que nos gustaría saber: ¿Existe algunha proposta oficial, e dicimos oficial, por escrito á Xunta de Galicia, mais alá de conversas telefónicas? Porque estamos vendo que ultimamente son moi dados a conversas telefónicas pero papel non aparece por ningún lado. ¿O Concello de Ames como institución, como organismo, presentou algún tipo de proposta por escrito á Xunta de Galicia, á Consellería de Sanidade, para a construción dese centro de saúde ou para a reclamación dese centro de saúde? ¿Ou simplemente son conversas que ten vostede, como nos acaba de dicir de onte mesmo, que ao final non sei con quen tivo a entrevista? Gustaríanos saber se existe documento oficial no que se fagan esas propostas, e lóxicamente se as nosas propostas teñen pensado ou teñen visto se poden ter viabilidade. Creo que son todas as preguntas que teño. Nada mais.

Intervén o **alcalde** para dicir: No tema da auga se convocará unha comisión proximamente para explicar todo o traballo que se estivo facendo. No tema da data en que subiu esa noticia da que vostede fala miraremos e lle contestaremos. Despois, se vostede quere que haxa unha proposta por escrito de cada Consellería, porque eu entendo que moitas veces as conversacións ao mellor a vostedes non lles serven, pois faremos unha proposta por escrito, non teño inconveniente. Intervén **José Miñones** para dicir: É que vostede é unha institución, ten que facelo. Eu podo facer unha proposta por escrito ou de viva voz, que son a oposición, pero vostede é o goberno, ten que facela por escrito, ¡claro que ten que facela por escrito! Se lle interesa, claro.

Intervén o concelleiro **Francisco Villaverde Marcos** para formular as seguintes preguntas:

**Trixésimo sétima pregunta:** Boas noites. A primeira pregunta ten relación cun escrito presentado con data de 11 de setembro de 2013, onde solicitabamos a relación das obras, arranxos, limpeza exterior e interior levadas a cabo en cada un dos colexios, escolas unitarias e IES do noso Concello, dende o día de hoxe ata novembro do 2013. E pregunto, ¿algunha vez se nos contestará ás preguntas?

**Trixésimo oitava pregunta:** Con data do 5 de decembro 2013 presentamos outro escrito preguntando si coa visita do xefe territorial da Consellería de Cultura, Educación e Ordenación Universitaria, Indalecio Cabana Leira aos centros educativos de Ames a Maía e Agro do Muíño, se realmente se analizaron con el as necesidades futuras do Concello, tanto en infraestruturas escolares como en persoal educativo. Tampouco houbo ningunha resposta. Antes Susana tamén falou un pouco das propostas que fai cada colexio para que se arranxaran. Eu creo que mais ou menos é posible, esa relación pódese facer a través dos traballos que se foron facendo en cada un deles, porque ás veces falamos cos colexios e coas ANPAS e mais cos directores e pídennos que apoiemos demandas deles, pero nós non sabemos se realmente están feitas ou se non están feitas, por iso nos gustaría ter contestación. Intervén o concelleiro de Comercio, Promoción Económica, Traballo, Turismo, Educación, Servizos Complementarios e Xuventude **Bernardo Moar Míguez** dicindo: En canto ás obras, non é actuar de mala fe, simplemente é que hai un chorro continuo, todos os días, a verdade é que sería complexo, ao mellor non tanto coller o listado como dicía dona Susana e ver o que se fixo dese listado, pero a partir dese listado van surxindo cousas a diario. De verdade que non é con intención de mala fe, é francamente difícil poder contestalas todas, non sería demasiado sinxelo, pero intentarémolo. Intervén **Francisco Villaverde** para dicir: No primeiro escrito poñíamos unha data que era practicamente antes de comezar a funcionar o colexio. Intervén **Bernardo Moar** dicindo: Si, pero arrancou o curso e xa se foron facendo cousiñas, xa se fixeron moitas obras. A raíz de aí seguimos, seguimos e seguimos. Con respecto á segunda pregunta, despois desa visita xa volveu por aquí o xefe territorial a facer outra, analizando outras necesidades que estamos a atopar, pero si que se están a avaliar esas necesidades educativas que temos, de feito estase avaliando algunha ampliación. Intervén **Francisco Villaverde** para dicir: Hai que pensar que Bertamiráns vaia a necesitar outro CEIP, porque temos que pensar que non se vai a facer para o ano que ven, posiblemente se faga dentro de 6 ou 8 anos, pero hai que empezar cos trámites. O mesmo para o CEIP do Milladoiro. Intervén **Bernardo Moar** para dicir: En realidade o que mais nos urxe é prepararnos de cara ao curso que ven, que é o que estamos a facer porque hai cousas bastante importantes e entón estamos un pouco centrados niso e xa estiven a semana pasada intentando traer outros colexios para o noso Concello.

Intervén a concelleira **Isabel González Cancela** para formular as seguintes preguntas:

**Trixésimo novena pregunta:** Boas noites a todos e a todas. Dende o mes de setembro non se lle está cobrando a axuda a domicilio aos usuarios. Eu quero saber os motivos pero sobre todo como se vai facer agora ese cobro, ¿vánselles pasar os seis meses?

Intervén a concelleira de Medio Ambiente, Sanidade, Cultura, Deportes e Benestar Social **Mª Eugenia Martín Vicente** para dicir: No sé de que estás falando. Intervén **Isabel González** para dicir: Dos usuarios de axuda a domicilio. Intervén **Mª Eugenia Martín** para dicir: Es que no lo has dicho, solo has dicho que desde el mes de septiembre no se esta cobrando el recibo a los usuarios. Perdón, no te he oído. Intervén **Isabel González** para dicir: Desde o mes de setembro aos usuarios de axuda a domicilio non se lles volveu a pasar o recibo, co cal, se estamos en marzo son 6 meses. ¿Cales son os motivos? ¿Como se vai a facer agora ese cobro? ¿Vánselle a pasar os 6 meses xuntos? ¿Vánselle avisar cando se lle van a cargar eses cobros? A min me consta que hai xente que incluso foi a preguntar á oficina da Deputación porque non se lle cobraba. Non estamos falando de ningunha broma, hai xente que a ver como paga. Sobre todo, eu creo que antes de pasarlle o cobro a eses usuarios, de algunha maneira se lles debería de informar cales son os

motivos porque non se lles pasan os recibos, que estamos falando de 6 meses. Contesta o **alcalde** dicindo: Preguntaremos mañá.

**Cuadraxésima pregunta:** ¿Cales son os criterios que se seguen para cubrir as baixas dos traballadores? ¿Por que uns departamentos si e outros non? ¿Por que unhas persoas si e outras non? Por exemplo, a min gustaríame saber porque non se cobre a baixa da educadora familiar. ¿Non fai falta nos tempos que vivimos? Ese entre outros, porque houbo moitas baixas que non se cubriron e xa volveron as persoas aos seus postos de traballo. ¿Cales son os criterios?.

Intervén o **alcalde** para contestar: Miraremos ese caso da educadora familiar. Contesta **Isabel González** dicindo: Eu refírome a todos, poño ese de exemplo pero hai mais. Contesta o **alcalde** dicindo: Hai algúns que están de baixa que se incorporan e outros ao mellor tardan mais na súa baixa pero mirarémolo e darémoslle unha contestación.

**Cuadraxésimo primeira pregunta:** Outra pregunta é sobre o concurso do transporte adaptado para persoas con discapacidade do Concello de Ames. O 25 de setembro de 2013, co número de entrada 13.776 presentamos por rexistro, despois lle darei copia de todas formas, solicitando acceso ao expediente, informe do departamento competente ,contratación, intervención, secretaría, sobre o estado no que se atopa o concurso. Queremos saber se a día de hoxe o concurso se atopa en vigor, se é posible a súa resolución, ou polo contrario debe de anularse e volver a licitarse. ¿É imprescindible que a resolución deste concurso teña que vir conxunto co regulamento do servizo? Se é así ¿cal é o motivo que conleva esa obrigatoriedade? ¿Por que despois de dous anos e medio non se resolveu este concurso?. Outro escrito con fecha do 26 novembro 2013, rexistro de entrada 16485, aparte de recordalo en todos os plenos: ¿solicitou o Concello de Ames a subvención do programa de inserción laboral de mulleres vítimas de violencia de xénero? De non ser así, ¿cales foron os motivos polos que non se fixo?.

Intervén o **alcalde** para dicir: Pois contestaremos as súas preguntas. Antes de levantar a sesión, procedemos a gardar un minuto de silencio en recordo do primeiro presidente da democracia, Adolfo Suárez.

Intervén **Anxo Doval Rey** dicindo: Eu vouno a gardar, pero vouno facer aí afora, porque se tedes esa consideración con quen trouxo a democracia, hai que tela tamén con quen a perdeu polas armas. Eu vouno a gardar, pero alí fora do salón de plenos. Xunto a él abandonan o salón de plenos para gardar o minuto de silencio fora os concelleiros/as Pilar Candocia Pita, Susana Mallo e Pilar Candocia Pita.

A corporación posta en pé garda un minuto de silencio polo pasamento do presidente Adolfo Suárez.

E non habendo mais asuntos de que tratar, o señor alcalde deu por rematado o acto e levantou a sesión ás 22:50 horas do día de referencia, de todo o que eu como secretaria certifico.

Vº Prace  
O alcalde

A secretaria